

TAPAK 7

Arnold-i first responder tem nem teyari agütsü

VOL. XVII NO. 147 (ADOK 147) DIMAPUR



TAPAK 8

Kanika Kapoor dak tasemben coronavirus putetogo

YANGTEPNÜ (THURSDAY) METSÜREMI (MARCH) 26, 2020

5.00

Nagaland nung nisung 5 negative putet; 3 indang result atar Nisung 1,543 quarantine süa lir

Kohima, March 24 (TYO): Nagaland nung Corona virus (COVID-19) keta lir ta temulung melemi bilemer nisung 8 indang sample tendangtsü atema bener yokogo, ta Nagaland Health and Family Welfare Department-i metetdaksü.

Yashi tashi nung sample pungu bener yokba ajak 'negative' ta putet aser tanü sample 3 bener yokba osang ano mangu lir, ta H&FW department-isa Bodbarnü ashi.

Tang tashi nung Dimapur airport nung nisung 5,433 tashi

screen süogo aser Dimapur railway station o road entry points nung nisung ajak agi 17,290 screen süogo, ta parnokisa shisem.

Screen asürtem rongnungi nisung 171 'surveillance' nung lir aser nisung 1,543 quarantine nung yua lir, ta Department-isa metetdaksü.

Tang tashi nung Isolation Bed 171 lir, bendanger (foreigner) 6 lir aser helpline ajanga call 17,897 süogo, ta Principal Director, Dr. Vizolie Z Suokhrie-i sangdong ka nung ashi.

India nung coronavirus aketer nisung 600 tema kümogogo

New Delhi, March 25 (Agencies): Bodbarnü Madhya Pradesh aser Tamil Nadu nung coronavirus ajanga nisung ana asüba osang sangdongogo.

Külen, yashi tashi India nung nisung 519 dak coronavirus putetba osang liasü saka tanü tashi nung nisung ajak agi 606 jungogogo.

Linük nung COVID-19 wara anema anogo 21 shibangtsü tenzükba anogo nung nisung talila dak coronavirus aliba puteta liasü.

Ajisüaka, Health Ministry-i Madhya Pradesh kübok Ujjain nung arishi küm 65 tain tantür ka asüba osang ano mejangtatep lir.

Tanü Varanasi nung alirtem den jembidang Prime Minister Narendra Modi-i "healthcare aser airline nung mapa inyakertem dak tim masüba inyakertem ozüing tesashi agi merenshitsu" ta metetdaksüogogo.

"Mozü ki aser clinic tem nung süoshi temesüing agirtemji tang asen Tsüingremtem lir. Parnok

akhümstüba. Parnoki parnok taküm lendongbang nung lia asenok kümzüksü meranger" ta Modi-i ashi.

Home Ministry-ia National Population Register (NPR) update asüba aser Census 2021 mezüngbuba telemsa maparen meinyaki atatsü telemteba agiogo. Iba maparen ana ya taküm April 1 nungi September 30 tashi inyaktsüba sentong liasü.

Ano külen, Union Finance Minister Nirmala Sitharaman-ia income tax returns file asütsüba anogo atsülangogo.

"Financial Year 18-19 atema income tax returns file asütsüba anogo June 30 tashi apuloktsür. Mapang menur agütsürtem atema interest rate 12% nungi 9% tashi ajemtsür" ta Nirmala-i ashi.

Nirmala Sitharaman-ia "COVID-19 Economic Response Task Force" len ania inyaker aser tanü New Delhi nung osangbener senden ka nung lai iba osang metetdaksü.

Mkg nung gari ka tsükoka nisung ka asü



Mokokchung, March 25 (TYO): March 25 nü Mokokchung IOC anasa Mariani lenmang nung anüngdang 11:55 ako meta Maruti Van gari ka len kübok tsükok aser iba lendong nung gari anisangji atanga asü aser ana yirua lir, ta Mokokchung Traffic Police osang ka ajanga metetdaksü.

Tasüsangji Khensa nunger New Market nung alir Sashiwati Walling, gari No. NL 01 9598 aser len küboki aibaji feet 350 shi liasü, ta traffic osang ajanga jangjaogo. Iba dak sentakba nung PS II nung case registered süogo aser bushisüngdangba maparen tenzükogogo.

Dimapur Deputy Commissioner-i tetuyuba agütsür DOKANTEM 8:00 AM NUNGI 2:00 PM TASHI LAPOKTSÜ

Dimapur, March 25 (TYO): March 15 nungi April 12, 2020 tashi linük ajunga shibangba ya COVID-19 prokshiba noktangtsü atema lir, ta Dimapur Deputy Commissioner Anoop Kinchi IAS-i tanü metetdaksü.

Iba mapang public-i kidang dang amongtsüla aser family outings, picnics aser tanga sentongtem magitsüla, ta Dimapur DC-i ashi.

Tetuyuba agütsüba alema inyakertem Indian Penal Code nung Arlla 188 kübok merenshitsu, ta paisa shisem.

Dimapur jila nung tang nüngdakba ayokba dokantem anepdang 8:00 ako nungi nikongtsütsü 2:00 ako tashi dang lapoktsü tetuyuba agütsür, ta DC-isa ashi.

Public-i iba mapang tsüingda

dang shishilembatsü metetdaksür, ajisüaka pharmacy aser medical dokantembo akhi ama lapoktsü melar, ta paisa shisem.

Anoop Kinchi IAS-isa tenokdangba kübok madenba dokantem nem tetuyuba kar agütsüogogo.

India ajunga shibangba mapang Pharmacy, Fair Price Shop, Grocery store, aser aonsotsü dokantem lapoktsü melar aser item asoshi Dimapur DC-i tetuyubatem agütsü.

Dokan kiburtemi face mask enoktsüla aser public den tepila yur shishilembatsüla.

Dokan kibur ajaki hand sanitizers ayutsüla mesüra teka metsüksü atema dokan kima nung yutsütsüla.

Dokantem merükmejua ayutsüla aser mozü agi

shidoktsüla.

Dokani aoertem kati ka tsüingda metre ka ka tetsüingda ayutsüla. Dokan kiburtemi nisungtem noktaksü atema tesem latettsüla.

Tang nüngdakbatem shishitsu atema kibong ka nungi nisung ka dang ki toktsür aotsüla.

Kidangi nungi kimai aoertem ajaki mask enoktsüla.

Nisungtemi dokan kima telong junga noktaktepe/mentepa mekazütsüla.

Item tetuyuba sülen manidakertem Indian Penal Code nung Arlla 188 kübok temerenshi alitsü, ta Dimapur Deputy Commissioner-isa metetdaksü.

Paisa, SO(CC)& LPG Sales Dimapur SA dang LPG Cylinders ki tonga oa agütsütsü atema tetuyuba agütsü.

Kohima nung alirtem kidang among; CS-i nenshir

Kohima, March 25 (TYO): Prime Minister Narendra Modi-i linük ajunga shibangtsü tetuyuba agütsüba sülen Nagaland yimtiba Kohima nung tanü nisung ajak kidang nungi malu aser garitema mesenzütsü.

Police den Dobashis (DBs) aser Angami Youth Organisation züngsemtemi tanü Police Headquarters nungi High School junction tashi tesem balala nung noktaker mita anük.

Tang nüngdakba aser

mozütem ali aoertem dak alaka, parnoki nisung shinga mesenzüdaksü.

Kohima district administration-ia pei pei kiyong telongtet nung dang shishilembatsü tetuyuba agüja lir.

Tanü nüngdak mali ser kima nung senzür kar police-i pua merenshi.

Nagaland nung pharmacy aser tang nüngdakbatem ayokba dokantem dak alaka ajak shibanger.

Külen, Nagaland Chief Secretary, Temjen Toy-i tanga sangdong ka nung "tangstate ajunga shibangba ya sodi mapang ka masü" ta nenshia metetdaksüogogo.

COVID-19 tensa ajuruba ajanga shibangtsüsa aküm anungji iba mapang nübortemi kimalen aser picnic mesenzüi, kidang dang amongtsüla, ta Chief Secretary-i ashi.

Temjen Toy-isa ozüing alema inyakertem ozüing tapet agi merenshitsu ta nenshia metetdaksü.

NHRA Dimapur Unit-i teyari meshir

Dimapur, March 25 (TYO): Alima nung COVID-19 wara ajanga rongsenkettsüing tsütsü takoksa ajurur aser iba nung Nagaland Hotel and Restaurant Association (NHRA) Dimapur Unit-a dena lir, ta NHRA mendenpurtemi Nagaland Chief Minister dang shidi ka nung ashi.

Tenokdangba balala ajanga bookings thiogo aser iba ajanga hotel industry nung timtem

ajurur. Iba ajanga hotel aika shibangtsü tia ka ajurua lir aser ki para den staff nem itasen agütsütsü makoktsüsa tia ka ajurua lir, ta NHRA-i ashi.

Hotel industry ya Tourism Industry den sendaktepa lir aser iba ajanga state rongsenkettsüing nung shilem agir. Hotel industry-isa lanur nem mapa aika agütsür saka wara adokba ajanga timtem ajurur, ta parnokisa metetdaksü.

"Iba ama tensa ka nung onoki loan indang EMI aser Repayment mesüteter anungji sorkari onok yaritsü mepishir. Centre aser state sorkartemi onok nem ita 6 GST holiday agütsüdaksünür. Onoki electricity bills magütsüteter kechiyong onok commercial category nung dena lir" ta Tir Vito Aomi aser Tongti Tezülur Seyiekhrielie Natso nati shidi nung shia lir.

NVCO & KDTODU-i metetdaksür

Dimapur, March 25 (TYO): Kohima District Truck Owners & Drivers' Union (KDTODU) aser Nagaland Voluntary Consumers' Organisation (NVCO)-i shishilembar dang jenjang tur mayoktsü aser state sorkar dang healthcare sector nung nüngdakbatem agütsütsü atema mepishia metetdaksüogogo.

State sorkari sensotem COVID-19 nungi kümzükka ayutsü atema mapa inyaker, ta KDTODU aser NVCO-i sangdong ka nung ashi.

Kohima nung dokan kibur kari transportation charges tenüing amer jenjang tur ayokba osang

onoki angazükogogo. Aisüaka, transport services nung shilem ka ama onoki transportation charges nung sen matu, ta KDTODU-i ashi.

KDTODU-isa Public Carriers ajak dang Nagaland Police-i lapokba check-gates aser highway nung state sorkar tenüing nung sen meshiba kecha magütsütsü atema metetdaksü.

Ano külen, NVCO-ia ashiba agi parnok dangi mask aser sanitizers nung jenjang tur ayokba osang aika sangoktsüogogo.

District shia nung alirtemi shishilembadak lateta aliba jenjang nung ayoktsü atema District

Administration den yariteptsüla aser shishilembartemi jenjang tur mayoktsüla, ta KDTODU aser NVCO-i metetdaksü.

Sorkar mozü kitem nung inyakba doctor, nurse mesüra staff tem kümzükka ayutsüla aser mozü ki aika nung nüngdakba osettem maliba osang angashir, ta NVCO aser KDTODU-isa ashi.

Nagaland Chief Minister aser Medical Minister-i anir state sorkari healthcare sector nem nüngdakba osettem agütsütsü atema mepishir, ta NVCO Tir Kezhokhoto Savi aser KDTODU Tir Riivese Sokha nati sangdong nung ashi.

State ajunga shibanger aliba mapang kentsenka prokshir



Kohima, Metsüremi/March 25 (TYO): Nagaland densema linük ajungalen shibanger aliba tensa ka nung Macnivil densema CJ Gurung-i Music Video tasen ka, Kohima Anthem ajanga social media sabang balala süngtagi.

Kentener den sensaksema mapang ashiba agi, nübur ajak asoshi ibai tetendanga mapang ka lir, saka iba tetetzü loktiliba nungi pila alitsüba mesüra quarantine asütsüba ya

tezüdanga mesüra azüngmeyaka liang ta ashir masü.

Iba tangatetba nung Music Video ya saya, anungji tesem ajunga shibanga aliba mapang nübur ajungai pei kidang nungi anisüngzüka reprangtetsü.

Iba ken ya benjongtepba indang lir aser tepour tajung Kohima yimti aser yangji aliba nüburtem atema lir.

Iba mapa ajanga tensa ajunga asen taküm den sendaktepa lir aser asen

jakdang temoatsütem aruba ajunga züngdanga asen nübur aser asenok aliba tesem den asenok sendaktepba angatetdaktetsü.

Iba Music Video ya Naga Twist Productions nungi Hriiyio Paul-i direct asü aser Clef Ensemble nung Ket ya Beat nung co-producer ka ama record, mix aser master asü. Iba ama tensa nung nüburtem dak kilung nung alitsü ajungshir, ta parnokisa ashi.

Diphupar 'B' Ao Lanur Telongjem-i aitsür

Dimapur, Metsüremi/March 25 (TYO): Ozü züngsem, Imtisunep dak COVID-19 tashidak keta lir ta social media sabang balala nung tiazü osang prokshiba asoshi Diphupar 'B' Ao Lanur Telongjem-i khukhua aitsür.

Iba osang ya khenyongi tai aser tajemdak dak maka dak nüburtem dang metetdaktetsü, ta Diphupar 'B' Ao Lanur Telongjem tir Temsu Longkumer aser tezülur, M.

Yanger Pongen nati sangdong ka ajanga metetdaktetsü.

Tanurtsü anogotem nung kuli tejanga mesüra ochi memeteti iba ama taila osangtem mejangjai meporokshitsü nüburtem dang mepeshir, ta sangdong ajangasa ashi.

Iba ama taila osangtem prokshiba ya ozüng nung aibelenba kisüng masü saka tang ama tensa tamajung nung nüburtem tsübutepdaktetsü, ta sangdong ajangasa ashi.

Coronavirus ajanga Bank temi ki tonga sen bentsür arutsü

Guwahati, March 25 (Agencies): Nisungtem kidang dang amongba aser ATM-i aotsü makokba atema bank aikati 'money at your doorstep' service tenzükogo.

SBI, ICICI Bank, HDFC Bank, Axis Bank aser Kotak Mahindra Bank temi customer ki tonga sen bentsür arutsü.

SBI-i customer ki tonga sen bener arutsütsü aser transaction ka atema Rs 100 agitsü.

Iba facility ya tang teintet rogotem, matamabensartem atema tenzükja lir saka medical emergency ajurudang customer mashii kati iba teyari meshitsü akok.

Iba service angutsü atema customer temi <https://sbi.co.in/dsb> nung order asütsüla.

HDFC Bank-ia parnok

customer tem atema ki tonga sen bener otsütsü aser senji Rs 5000 nungi 25000 tashi asütsüla. Iba mapa atema HDFC-i Rs 100-200 agitsü akok.

ICICI Bank-ia iba facility tenzükogo aser parnok customer temi Bank@homeservice nung iba facility meshitsü akok.

ICICI Bank customer temisa anepdang 9:00 nungi nikonngtsütsü 2:00 ako tsüngda customer care service ajanga sen order asütsü akok. Sen order asüba sülen ghonda 2 tsüngda parnoki ki tonga sen bentsür arutsü.

ICICI atema limit ji Rs 2000 nungi Rs 2 lakh lir aser parnoki khen atema Rs 50 (one time) mesüra sen indang 18% ta agitsü akok.

Aboi nung COVID-19 den raratsü renemshir



Dimapur, Metsüremi/March 25 (TYO): Coronavirus tashidak nungi jenbua alitsü asoshi Aboi Town Students' Union (ATSU) renemshir, ta sangdong ka ajanga ashi.

ATSU ajanga jila nung lemjem aser tongtibang tesem ajunga nung tzü aser hand sanitizer yutsü tenzükogo. Anogo 21 ashi linük tesem ajunga shibangtsü sangdonga

liaka ATSU tir Lipsing-i jila nung aliba nüburtem nem "JUST WASH HANDS" ta asüba osang sangoktsüner.

Jila nung iba tashidak wara nungi kümzüka alitsü asoshi jelia renemshiba maparen ya ketdangsertem nungi senotsü teyari bendena tzü aser sanitizer ya ali. COVID-19 tashidak wara den raratsü asoshi WHO, MoHFW GOI aser H&FW

Nagaland ajanga totuyuba agütsüba sullen anidaktetsü ajungshir, ta ATSU sangdong ajanga ashi.

COVID-19 tashidak wara alima sünga prokshiba yagi Aboi nunga renemshia aser küm kümshia alitsüsa akümer, anungji danga state aser linük nungi arua aliba nüburtem dang pei sasa lokti nungi pila farm mesüra alo nung alitsü ajungshir aser pei kinungertemi chiyongtsü aser apensüoshi agütsütsüla. Aboi nung nisung ter shi lokti nungi pila lir aser kaketshiri parnok dang sorkar nungi totuyuba agütsü matai pei sasa iba tashidak den raratsü asoshi akokba meratem agitsü ajungshiogo, ta ATSU general secretary Manwoak-i ashi.

Social media nung Aboi nungi tawa tesem balala nung jajartem tenüng agüja alirtem ya quarantine süa lir, ta paisa ashi.

Kasa mapang ATSU-i Ward Task Force züngsemtem dang teka shidoktsü asoshi inokja aliba unit tem anepalutsü mepishiogo

Rotary Club Dimapur-i mask aser sapon agütsü



Rotary Club Dimapur tenüng nung DC Dimapur Anoop Kinchi IAS ajanga March 25, 2020 nü IRB Mahila Battalion nem mask aser sapon agütsüba mapang tangokba noksa nung angur. Kasa noksa nungsa Club züngsemtema angur.

Dimapur, Metsüremi/March 25 (TYO): Coronavirus tashidak nungi jenbua alitsü asoshi mera ka ama Rotary Club Dimapur-i nisung meimchir den yimya tajung agi yaritepba maneni sayua Dimapur telungtet aser temeket nung nüngdakbapur nem mask aser sapon agüja liasü.

Dimapur kübok colony ter nung Rotary Club Dimapur ajanga mask 10,000 aser sapon 10,000 agütsüogo. March 25, 2020 nü West Yard colony, Cheswari colony, Rail bazaar, Netaji colony, Namgalong, Veterinary, Miu, United North

Block B, Naga colony aser Haralu colony tem nungi GB tem nem mask aser sapon 500 nungi 600 tsüngda lema agütsü. Iba anogosa Rotary Club Dimapur tenüng nung DC Dimapur Anoop Kinchi IAS ajanga IRB Mahila Battalion aser nüngdakba nisung kar nem mask aser sapon lema agütsü.

Rotary Club Dimapur tir, Ashok Agarwal-i ashiba agi, maneni parnok item nüngdakba oset ya Civil Hospital, Commissioner of Police Dimapur, district administration aser osangbener nema agütsütsü.



Coronavirus agi nüburtem amokmerena aliba tensa ka nung Signal Angami Village united VLO ajanga March 25, 2020 nü Signal Angami nung aliba VLO office nung chiyongtsü tabu balala lema agütsü. Tiri anir SHG züngsemtem den Guanbura temi Signal Angami telungzük nung aayanger kibong 15 nem chiyongtsü lema agüja liasü.



Tripura yimtiba Agartala nung Bodbarnü Municipal mapa inyaker temi tesem balala nung mozü rüka aodang agiba noksa angur. (Agartala, March 25)

Mizoram nung coronavirus putet; NE nungi nisung 2 kümogo

Aizawl/Imphal, March 25 (Agencies): Mizoram nung arishi küm 50 tain ka dak coronavirus aliba putetogo aser iba ya Nortehast nung nisung tanabuba lir, ta Bodbarnü ketdangsertemi ashi.

"Mongulbar aonung tesü arishi küm 50 tain tebur ka dak nCoV putetba sülen, idangjisa pa Aizawl nung Zoram Medical College and Hospital-i anir orr isolation nung yua lir" ta Mizoram National Health Mission (NHM) Director Eric Zomawia-i ashi.

Iba nisungji March 16 nü Amsterdam, Netharland nungi Doha- Delhi -Guwahati ajanga Aizawl-i aru, ta paisa ashi.

"Pa Aizawl tongli par kidang 'self isolation' asü aser phone ajanga doctor tem den tongtep. Deobarnü pa indang sample agizüka tendangtsü atema yok aser iba indang osangji Mongulbar aonung tesü angu" ta

NHM director-isa ashi.

Iba nisung kinungtsü aser tanur ana Zoram Medical College and Hospital nung quarantine süa lir. Tebursangji pastor ka lir aser Amsterdam-i azüingi aoba liasü.

Northeast nungi mezüngbuba nisung dak coronavirus putetbaji Manipur nung arishi küm 23 tain aiür ka lir.

La ya tang Imphal nung aliba Jawaharlal Nehru Institute of Medical Sciences (JNIMS) nung anepaludar.

Iba tetsürla ya tayimtsü nung Agartala ajanga Imphal-i aoba osang angazükba sülen Tripura sorkari iba tetsürla den külemi amenba passenger tem bushitsü tenzüko.

Arishi küm 23 tain aiür ya London nungi Kolkata aser Agartala ajanga Imphal-i aru. Imphal airport nung la temang tendangba sülen sota ayu.

Airport nung la dak coronavirus keta aliba ama ajitet aser ibaji tendangdang putet.

Iba sülen la isolation ward ka nung anepaludar aser tajungba akümtsü imlar, ta osang ajanga ashi.

Iba atema tebilemtsü kaji Manipur tsürlaji Air Asia flight ajanga aru aser ibaji Manipur-i amodan maodang Agartala nung anenzük.

Iba jagi Tripura Task Force-i tetsürla den anasatapa amenba passenger tem bushiteper.

Külen, Tripura passenger aika tetsürla denji külemi Imphal-i ao aser iba atema Manipur sorkaria parnok bushitsü tenzüko.

Manipur sorkari iba tetsürla den anasatapa aoer passenger aser sensotem dang ketdangser nem osang sangoktsütsü aser parnok temang tendanga anepalutsü atema osang metetdaksüo.

Tripura Police-i jenjang tur ayoker shishilembar 6 apu

Agartala, March 25 (Agencies): Tripura police-i Bodbarnü 'Durga Chaumuhuni', 'Lake Chaumuhuni' aser 'Maharaj Ganj Bazar' nung jenjang tur ayokba shishilembar

6 tashi apu. DM Sandeep Mahatme aser SDM Asim Saha nati anir mita aodang shishilembartemji apu.

State ajunga shibangtsü tetuyuba agütsüba sülen Asim

asur Sandip nati shishilembadak jenjang tur ayokba mita aotsü mapa tenzü.

Ajisüaka, shishilembartemi Coronavirus tebilemtsü nung tajangzük agia jenjang tur ayok.



Bodbarnü Janata Bhawan, Dispur nung Assam Minister of Food and Civil Supplies Phani Bhusan Choudhury den department ketdangsertemi osangbener den jembidang agiba noksa angur. (Dispur, March 25)

Assam Assembly indang budget session jelia temogo

Guwahati, March 25 (Agencies): Coronavirus wara nungi küm danga alitsü atema Mongulbarnü Assam Assembly budget session tembangogo.

Yashi Assam Legislative Assembly-i bill aika agizük aser bills rongnung tesayurtem küm 10 majungdang transfer masütsüba dena lir.

Shitakba agibo budget session ya March 30 tashi agitsüba liasü, saka Hombarnü party ajak senden ka amendang Mongulbarnü tembangtsü atema telemtetba agi.

Mongulbarnü Court Fees (Assam Amendment) Bill 2020, the Guwahati Municipal Corporation (Amendment) Bill 2020, the Assamese Language Learning Bill 2020, The Assam Elementary and Secondary School Teachers (Regulation of Posting and Transfer) Bill 2020 aser Assam Non Government Educational Institutions (Regulation of Fees) (Amendment) Bill 2020 agizüka liasü.

Bill temji Speaker indang tashi amshia agizük aser Opposition-ia olemtep aser o atsütepba kecha maliasü.

State sorkarisa bill asem-Moran Autonomous Council Bill 2020, Matak Autonomous Council Bill 2020 aser Kamtapur Autonomous Council Bill 2020 benok.

Assam Elementary and

Secondary School Teachers (Regulation of Posting and Transfer) Bill 2020 ajanga tesayurtem küm 10 majungdang transfer asütsü memelar, ta Education minister Himanta Biswa Sarma-i osangbener dang ashi.

Iba Act anema district mesüra block education officer kari danga transfer asütsü atema shidi zülura, küm ka atema tepuokdak ayutsü, ta Sarma-isa metetdaksü.

Guwahati merüktetsü: Guwahati Municipal Corporation (GMC)-i Coronavirus (COVID-19) prokshiba azüoktsü atema March 24 nungi 29, 2020 tashi Guwahati yimti mozü agi merüktetsü mapa tenzüko.

GMC-i State Fire & Emergency Services teyari agia iba mapa inyaktü aser fire tender temji Dispur Supermarket/Fire Station Centre, Guwahati Club Point, GMCH Bhangagarh, Mazar Road Near ASTC, Adabari Bus Station aser Lokhra Chariali nung adenshitsu.

Assam sorkari emergency services dak alia state ajung aMarch 31, 2020 tashi shibangtsü tetuyuba agütsüo. Sorkarisa April 1, 2020 nungi Assam public distribution system centres ajanga jang angati alemtsü telemtetba agiogo.



Guwahati, Mar 25 : Anogo 21 linük ajunga shibangba mapang Assam nung tetsür police temi mask agir Guwahati nung nüka mitba angur.

Bhutan-i kozü aser patio abenba noktanger

Guwahati, March 25 (Agencies): Mongulbar nungi Doma (kozü) aser Pani (patio) bener aruba shibangogo ta Bhutan agriculture minister Lyonpo Yeshey Penjor-i metetdaksü.

Coronavirus wara nung ajemdaker tanga linüktem nungi aonsotsü, süngjanglijang aser shi bener aruba ajak noktangogo, ta agriculture minister-isa ashi.

Ministry of Health (MoH)-i Bhutan-i bener aruba osettsüset ajak mozü agi merüktetsü sentong renemba sülen iba telemtetba ya agi, ta paisa shisem.

Aonsotsü, süngjanglijang, shi, kozü aser patio mozü agi memerükytettsü, anungji bener marutsü noktanger, ta Penjor-isa metetdaksü.

Bhutan-i India den international border ajak shibangogo aser Mongulbar nungi international crossings ajak nung tenokdangba agütsüo.

"COVID-19 ajanga tensa melenshiba aser iba wara ajanga lendong bentsür aruba noktangtsü atema international borders ajak shibangtsü" ta Hombarnü Ministry of Home & Cultural Affairs, Royal Government of Bhutan-i metetdakja liasü.

Border crossings ajanga Bhutanese nunger arurtem medical screening asütsü aser hopta anabosa quarantine nung ayutsü. Bhutan nung tang arua aliba bendangertem linük toktsür aotsü asoshi temelaba agütsütsü, ta sorkarisa metetdaksüo.



TIR YIMYIM

YIMOBILEM (EDITORIAL)

DIMAPUR YANGTEPNÜ, METSÜREMI (MARCH) 26, 2020

Ibai mapang tajung südaktsüdi

Tang tashi Nagaland nung alirtem dang masü saka tanga bendanglen alir Naga nungertem rongnung ka dak danga coronavirus tashidak agi atongba osang mangashiba ya tesümgangtsü Tsüngremer taochi mapa ka lir. Nagaland nung asenoki Tsüngrem anema inyakba yaribo Naga nung er ajak ya tashidak wara agi tonger taneptsü bushidak maka anogo shia tesem ajaklen mangyimba agi sünga alitsüa langa lir. Ajisüaka, ken nung atenba ama, asenok menen dang nungi Tsüngrem temeim aser taochisa tuluba, iba temeim aser iba taochi agi asenok wazüka toktsür. Ibaji angateta asenokbo iba ama tetsübuttsü aser shisabolutsü mapang tamajung ya mapang tajung kümdaktsütsüsa tasü itshidi, tamang ulushidi aser Tsüngrem dang kanga pelar ta shidi. Ashiko, asenoki yangluba tenla kitem ya tesempatsü ali rongsentem bendena yangluba agi asenok külemi tekülem mapang magitetsüsa Tsüngremi inyaker südi. Mesüra, tanüla anir aruba mapa inyaktsü melen Tsüngrem nem agütsüba tenla sen teimbaka tenla ki yangluba nung endokba agi Tsüngrem jashir asütsüa akok. Ajisüaka, pai asenok tesamatsübo mesamatsüi wazüka yutsüba ya asenok temulung meyipa asentenshidaktsüner asütsü. Aji oda, Tsüngremi inyakba kechisarina ajakji asenok ajungtsü atema inyaker asünungji, iba tajungji asenoki agitetsüsa asenok tamang agi Tsüngremer sentong angatetsüsbaji kanga tongtibang kümogo. Atangji, ibai asenok ajak asoshi tamang tendangba mapang ka lir, anungji shibabo kechi jenjang nung takok angutsüar, ibajibo pei tamang yari pei dang shitetsü. Iba ama mapang nung asenok tetsübu aser shisabolu nem kokdaktsüra, coronavirus agi masü saka tsübuba tashidak agi timatemtsü. Anungji, kanga kümdangtsü tim saka kangabo metsübuli kechiyong coronavirus agi masüyonga asenok kenübo asütsübasa ta asenok ajaki meteta lir. Iba tangatetba nung tashidak mesen tsübu kidang amajok nung mapang endoka kazütsü melena tang ama mapang ya asenok asoshi ano taküm piyong asoshi temoatsü poktetdak mapang ka kümdakja asenoki inyaktetsü lenmang aika lir. Item lenmangtem rongnung tongtibangtibaji, tenla kidang lokti tulu nung külemi tekülem mapang agitsü melena to pei kidang kibong tekülem agia Laishiba zünga Tsüngrem o angatetsü merangba sentong tenzüksüla. Tenla ki tuluba to asen kidangi bener aruba temoatsüji tulu, anungji akhi nung sentepi maortem asoshia ibai kinungertem den külemi Tsüngrem külemtsü mapang tajung lir. Kibong tekülem sentongji tenla kidang agiba arogo sentong amai kinunger rongnung nisung ka menden asütsü aser ken ka tena sentong tenzüker nisung ka nem sarasademdaktsütsü aser Lai o ka külemi azüngtsü aser tanur aika alirtembo tanurtem ajaki shilem agia pei angatetba ashitsüa akok. Lai bushitsüba tapu aser tekongji tanurtem nem jelia agütsür bushidaktsüra, parnoki internet ajanga Tsüngrem o teratet tajungba bushiteta bener arua lemsateptetsü. Iba ama mapang nung kiinungertem rongnung taküm kuli shiteptsüa akok mesüra tsüraburtemi parnok tanur asüba mapang pei tsüraburtem den aliba otsü tanurtem dang ashitsü akok. Ibaji kinungertem rongnung taidok meshitepba aser tenüngsang agütsütepba mapang tajung kümdakja asenoki anogo shia sentong yanglutsüla. Ibaji dang masü saka ibai kinungertem külemi otsü atongba aser külemi chiyongba mapang tajung ka südaktsütsüla. Tanü asüng asenok ajaki kakat mazünger, anungji Laishiba azüngba nungi tenzüker tanga kakatema azüng tenzükra, ibai takoksa mapang masü tashitemetet küma tajangzük anguba mapang ka asütsü. Ano, atsü (garden) aser alu ana nung alirtem asoshi ibai metsü (seeds) azüngtsü mapang tajung lir, anungji asentzü sendoka atsü nung aonsutsü kar danga meydaktsütsüsa metsüjangnutsü bushitepa zünga, ibaji mapang tamajung agi tajung kümdaktsür inyakba temoatsü asütsü. Mapang tamajung agi tajung küma alitsüsbaji asenok shinga dang temelaba agitsü menüngdaker, ibajibo asen mulung asütsü.

OLEMSABANG

NÜBUR NÜNGDAK TULUTIBAJI TZÜ, MOPUNG, LIGHT ASER LENMANG

-I.Zülü Pongen, Mongsenbai Ward, Mkg

Nübur ajaki nüngdakba tulutibaji tzü ya ka, mopung ya medeni nisung taküm melitet, saka yabo ministeria magütsütet, yabo Tsüngrem shilem.

Light aser lenmang, ni joko küm 70 jungogo, 1964 küm nungi tenzüka election agia arur, idangji candidate shiai pa adokra yamai inyaktsü, ni ya bener arutsütsü ta nangzüker, saka tadokeria pa adokerbo ajak amar, mapa kecha meinyakaka karbo anaben asembera adoker. Akhidangbo ochi mapang asüji sen kanga meindok, oda lia-lia power raktepdang party ka nungi adoker ano kati oli ta senzüktepdang nüburi sen angatet, kechiaser election-i yir adokertemji party principle makaba nüburi ajitet, ya sen atema dang lir ta angatet nungji nüburtemia sen yong tang vote ya agüja arur.

Saka tanü ni shinüba kaji shingaia kecha tajung inyaka mangui lia arudang Mokochung Town constituency nungi adokba Metsübu Jamir hon'ble Minister Rural Development Department, paibo onok constituency nung solar light agi kinük ajak sangwadaktsür, tangar shingaia meinyaktetba mapa ajak inyaka black topping agi nüngdakba tesem ajak tongsüogo, kangasa pelateper. Pa ya tzü angur Jamir kidong ka ama pai tzü aliba tesem tendanger tzü aliba tesem ajak nung tzü perepteta temeket alir aser tetsünglen alirbo aser pei koka alirbo pipe bener oa taluposa tzü agiteper. Ano iba dak alaka nüngdakba ward tembo Community hall tena yanglutsür.

Community Hall ka asütsüji saru melok agi tangbo taginüba ama merenemtetsü, saka asen lenir-i tatem tashi yanglutsütsü nangzüker joko tenzüka odagi, ward sanger ajak pelateper. Ozü minister-ibo adoktsüba langa nangzüker inyadaki, nübur lenirji yamala lenir aginer. Alima yanglur, terenlok mapa inyaker lenir kaji nüburi nüngdaker. Shiba südir süang partyji tongtipang masü, saka linir tajungji ano tarutsü nunga tongtipang asütsü. Anungji nübur ajaki angateta yaritsü aser nungitsü ayongzüker.

Pa amaji minister, Advisory aser Chairmanship agia alir ajaki mapa tajung inyaktsü mepishir. Ano ni mepishir, nübur yariang, saka party worker yaseta teyutsüma, ashiko ayaba ne party worker-tem jagi ne nem tashi mulungsentsü bendanga magütsüra na tarutsü asoshi takok mangutsü akok.

O Naga lima yimsüsürtem, nai metetaka lenmang meyanglurji garibo mejajatetsüsa kümogo, anungji nai lenmangji meyanglutetsüsa sanction makara nenok minister-tem atema tanga Kor kaka aliangma. Kor kara apua menüngdak, kechiaser Koribo tzü wateter aser lenmang ajung majung kecha mashishir. Nenoki nübur memetetaka nüburttemibo nenok asoshi bilemetsür. Kanga peler.

To,

Ao Senden
(Through President)

Sub : **29th August, 2010 Tir Yimyim Olemsabang nung "Aolisanger nem tenangzükba ka ratetsür" ta züluba ocet meyipa agir.**

Tetushi Aoli Senden Sanger,


"Temalen zülua aliba onük nung ajemdaker 29th August, 2019 nung ni koba onüktemsa olemsabang nung Aolisanger den lemsatepogo, item onüktem kü meyonger memeteti kü mulung shisa tatsü asen Aoli senden nung ketdangpurtem aser ano yamaji iba ocet azüngertem mulung yirutsüsa zülua tsüli-oli zülü kechisa lir, item ajak ni meyipa agir aser Ao Senden sanger dangi tai tatok meshia iba zülü ajanga abener.

Sd/-

P. Wati Jamir
(Retd. Headmaster)Tuli

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

India nung Khristantem atema sarasademtsü ayongzüker: AICC



March 25, 2020: Tesüiba küm ka tsüngda India nung Khristantem anema inyakba aser amokmerenba kanga bulua kumogo, ta Evangelical Fellowship of India (EFI)-i metetdaksü.

Yaküm India nung Khristantem anema inyakba tatalokba 366 liasü; 2018 küm nungbo item ama tatalokba 325 dang liasü; 2020 küm tenzüker mezüngbuba ita ana nunga Khristantem anema inyakba tatalokba 40 dak tema liasü, ta EFI-i metetdaksü.

Item tatalokba aika rongnung Khristantem dak azükba, amokmerenba, reshikangshiba aser Hindu alia amangertem den police-i Khristantem tekülem tagidak mapang nung timtem agütsüba densema lir.

"Joko state aika nung sarasadem sentong aser Amongnü tekülem sentong nung timtem agütsüba ya yimya ka kumadokogo," ta Evangelical Fellowship of India (EFI)-isa metetdaksü.

"Khristantem nem yazü nung tai tongloksür aser Khristantemi kangshia tamangba yimsü meyipdaksür, ta tai tongloksür," ta EFI-i metetdaksü.

Tawa US Commission on International Religious

Freedom-ia India nung Khristantemi tamangba yimsü meyipdaksür ta tai tongloksü Hindu alia amangertem Khristantem anema inyakba osang ka metetdaksüogo.

Release International nung Chief Executive, Paul Robinson-i, India ya tebilemte aliba linük ka lir, ta sangdonga India sorkar dang linük nung Khristantem kümzüksü atema mepishiogo.

Paul-i, tamangba yimsü nung ajemdaker tesempa mapa inyaksü atema India state tem nung anti-conversion ozüngtem lir, item ozüngji agientsüla, ta ashi.

"Hindu nationalism ainba mapang ka nung Khristantem anema inyakba kanga bulua akümer aser Tenla kitem amaker," ta pai ashi.

India nung Khristan nütüngji shilem 2 shi dang lir.

Release International-i ashiba agi, 2014 küm BJP sorkar aruba mapang nungi tenzüka India nung Khristan minority anema inyakba anasü agi timba kumogo.

Ano yaküm Narendra Modi-i tanabenbuba election nung takok anguba ajanga linük nung Khristantem ano taliba reshikangshitsü ta Khristantemi bilemer.

"Hindu nationalism ajanga ano Khristantem taliba amaksüa akok, ta India nung Khristantemi tsübur," ta Paul Robinson-isa metetdaksü.

"Joko küm aika Hindu yimsü alia amangertem Khristantem magizükteter, ibaji ajanga parnok anema taliba inyaker. Tamajungtibaji- India nung kaji Hindu asütsüla aser Khristan densema minority tem joko magizüktettsü," ta paisa ashi.

All-India Christian Council nung tongti, Kumar Swamy-i Khristantem dang India nung tamangertem atema sarasademjang, ta mepishiogo.

"Yimlibilema India atema sarasademjang," ta pai ashi.

"Asenok sarasademji, reshikangshi liaka India nung Yisu Khristar Arogoji taküm O nung akanga alitsü aser maneni osangtajung proktsü. Asenoki metsübuttsü saka maneni tasü itta akanga nokdaksü atema sarasademtsü. Iba ya India nung Khristantem atema tayongzükbalit," ta Kumar-i ashi.

"Release International den partnership atema Tsüngrem dang pelar. Iba ya kanga senti. Parnoki (Release International) sarasadem ajanga dang masü saka atangji nunga yaritsü," ta paisa metetdaksü.



Tzurangkong Arogo Tenzüker Telongjem-i (TATT) Nagaland Gate Tzutabala Semdanga, TATT tenüng nung Pastor tem kar aser TATT kimen Mr Jupang, Tzutabala nung Covid19 Nokdangtsü asoshi Medical team, Police, aser Administration kanga meranga inyakba asoshi tenüngsang agüja aser amangbapur ajaki nenok asoshi sarasademtsüdar ta tashi aitsü aser ano nendaka inyaksü ajungshiba den Chiyongtsü kar alia agüja sarasademtsür agiba noksa ka yangi angur.

ANO GO ABEN TSÜNGREM DEN

NE KOLAK TEJAKREP - (1Korint 12:14-27; 13:1-3)

"Iba lungma nung shiba tsükdir pa anüka raksatsü;saka shiba dak ibai tsükdir, iba jagi pa auyi küma menüngsatsü" (Mt. 21:44).

Lungji Yisu. Pa temetsüdaksü lung ka liasü, aser lung nungji metsüdaker (Rom 9:33; Isa. 8:14). Yangi tangazüksü lesson tulu agütsür: Tsüngrem anema kodanga teinyak!

Paul yimsü nung tejangra tulu aliba ngasangatem aser asüküm nisung ka liasü. Pa Kibubai atsüzük, aser tenük pokdaksü aser ochiba sayutsü pa dang sayu: "Aso anema metsütsü pa asoshi tasak liasü" (T.Mapa 9:5). Paul Professor Gamaliel kübok tangazüker ka süaka, pai iba ochiba timi angatetta mali asü. Kechiaser Gamaliel asoshi iba ama Teratatsü tia nung pa leniba nükjiongji: "...Saka ibaji Tsüngrem nungi süra, nenoki parnok samadaksütsü makoktsü, aser nenok Tsüngrem anema Rarartem ta nenoki angatettsü" (T.M. 5:34,38,39).

Tanü Tsüngremi alima ajunga nung sayutsüngitsü asoshi Khristan mapa tenzüka aika adokdaksüogo. Kar kijai, kibong telongjem aser kar tentet ka kümer inyaker. Asen lima teraksa lima nung onok mapa tajungba, tanela nung inyaker ta tokteper! Asenoki iba tangatetba memelenshira asenoki ajak dak tai kenshia bushitsü. Asenok dak aliba anak dang nungi tangar dak aliba anakji tuluba angutsü! Khrista kangkii asenok dak mapa meinyakdaksü tashi iba tangatetba memelenshitettsü. Pei dak aliba tashi mait mangatet tashi rongsen, mapang aser nübu indokba kisung jagi Khristan tenzüka mapa nung takok mangutsü.

Khristan minister aser tenzüka mapa nung shinga tabensaba mali. Ajak dak tashi mait aser tashi lir. Asenoki tangar meraksadaksü yanglutsütsüla. Tsüngremji Lung ka lir! Ni iba nung metsüksüla aser kü kolak mejakreptsüla. Adianu meimtepaji Tsüngremer metsü- anungji asenok o nung aser mapa nung meimtepdi.

Kibuba Yisu, Nai onok dang meimba ama onok rongnung meimtepa Khristan tenzüka mapa tashi ita inyaksü yariang. Amen.



Ao Baptist Arogo Mungdang (ABAM)

IMPUR-798 615, MOKOKCHUNG, NAGALAND: INDIA
E-mail : abamimpur7@yahoo.co.in
Website: www.abamimpur.org
☎ : 0369-2262202 (O)

No.:AB03A32/2019-20/70.

Dated Impur the 25th March 2020

Temeim tenzükerterem,

ABAM, Impur nung Yisu Khrista temeim salem metedaksür. Alima ajunga nung COVID-19 wara atema taneptsü mozü menguteti tim atemba osang asenoki angashidagi aser iba wara nungi Tsüngremi sarasadema taneptsü akangtsü dak alaka tashi tuluba ka maka ta jangjar. Iba wara den sendakba nung Prime Minister of India-i March 24, 2020 nung sangdong ajanga anogo aika kimai matoki kidang shipanger alitsü metetdaksüogo. Tamangertem sentep senji makatettsü asünung Chain of Prayer sentong yanglua pei tata mapang nung arogojem ajanga iba sarasadem agitsü osang sangdonger.

Ner arogo aoshi mapa aser anogo telemsa yoker. Arogoi anepalua iba sentong nung shilem agitsü mepeshir.


Kibuba nung tenzüker
Rev. Dr. Mar Atsongchanger,
Executive Secretary, ABAM

ABAM Arogojem Sarasadem yinzü
26th March 2020 - 16th April 2020

| Sl | Arogo | Anogo aser | Mapang tasazük |
|----|----------------------------------|---------------|----------------------------|
| 1 | Impur & Mopungchuket | 26 March 2020 | 12:00 am to 06:00 am |
| 2 | Sügratsü & Alongchen | 26 March 2020 | 06:00 am to 12:00 noon |
| 3 | Chami & Kobulong | 26 March 2020 | 12:00 noon to 06:00 pm |
| 4 | Longpa & Longjang Compd. | 26 March 2020 | 06:00 pm to 12:00 midnight |
| 5 | Longjang & Khanimu | 27 March 2020 | 12:00 am to 06:00 am |
| 6 | Longmisa & Chuchuyimpang | 27 March 2020 | 06:00 am to 12:00 noon |
| 7 | Tzüsapang & Mokokchung | 27 March 2020 | 12:00 noon to 06:00 pm |
| 8 | Mokokchung Compd. & Süngkamen | 27 March 2020 | 06:00 pm to 12:00 midnight |
| 9 | Alempang & Ngati | 28 March 2020 | 12:00 am to 06:00 am |
| 10 | MTBA& Marepkong | 28 March 2020 | 06:00 am to 12:00 noon |
| 11 | Kümlong & Artang | 28 March 2020 | 12:00 noon to 06:00 pm |
| 12 | Ungma & Settsü | 28 March 2020 | 06:00 pm to 12:00 midnight |
| 13 | Alichen & Kúpza | 29 March 2020 | 12:00 am to 06:00 am |
| 14 | Longkhüm & Mangmetong | 29 March 2020 | 06:00 am to 12:00 noon |
| 15 | Longsa & Chubayimkü | 29 March 2020 | 12:00 noon to 06:00 pm |
| 16 | Meyilong & Yimyu | 29 March 2020 | 06:00 pm to 12:00 midnight |
| 17 | Khensa & Moalenden | 30 March 2020 | 12:00 am to 06:00 am |
| 18 | Mekuli & Sapangya | 30 March 2020 | 06:00 am to 12:00 noon |
| 19 | Chungtia & Aliba | 30 March 2020 | 12:00 noon to 06:00 pm |
| 20 | Kinunger & Longtsüktep | 30 March 2020 | 06:00 pm to 12:00 midnight |
| 21 | Longjongkong & Yisemyong | 31 March 2020 | 12:00 am to 06:00 am |
| 22 | Longkong & Chakpa | 31 March 2020 | 06:00 am to 12:00 noon |
| 23 | Mongsenyimti & Akhoya | 31 March 2020 | 12:00 noon to 06:00 pm |
| 24 | Chuchuyimlang & Unger | 31 March 2020 | 06:00 pm to 12:00 midnight |
| 25 | Chuchuyimlang Town & Tzümokkong | 1 April 2020 | 12:00 am to 06:00 am |
| 26 | Mongsenyimti Compd. & Salulamang | 1 April 2020 | 06:00 am to 12:00 noon |
| 27 | Longchara & Changtongya Town | 1 April 2020 | 12:00 noon to 06:00 pm |
| 28 | Changtongya & Asangma | 1 April 2020 | 06:00 pm to 12:00 midnight |

Maneni asüng adok nung...)

OLONG PAITEP # 5407



- TIPIEN**
- 2. Teka mapa tajung - (8)
 - 4. Anakshinüba - (5)
 - 5. Süoshi agi tazü - (4)
 - 9. Aria bilemtep - (7)
 - 11. Ajemalu ozü - (4)
 - 12. Tzü an - (5)
 - 13. Teben teloktep - (8)
- LANGTSÜNGLEN**
- 1. Anepalua inyak - (7)
 - 2. Teptsü - (4)
 - 3. Nok agi raratep - (6)
 - 6. Kibong aküm - (4)
 - 7. Nüji masü - (4)
 - 8. Taruba küm - (7)
 - 9. Teka shidok - (6)
 - 10. Meputep/Mapet - (4)

OLONG PAITEP # 5406 TELANGZÜBA

- TIPIEN :**
- 1. Tzüshi, 2. Saru, 4. Renlok,
 - 7. Amos, 9. Zübi, 10. Teki, 11. Kija,
 - 14. Anitet, 15. Süng, 16. Tepunü.
- LANGTSÜNGLEN :**
- 1. Taremzü, 2. Sasa, 3. Rogo,
 - 5. Labi, 6. Kichiba, 8. Shisatsü,
 - 10. Teni, 12. Itsü, 13. Aong.

Agüja aliba noksa nung meputepi aliba 6 bushiang



TANÜBO NAI LANGZÜANG

Q. Jodhpur nung "City of Osian" temple ya shiba Rajput chuba aliba mapang yanglu ?

[A] Pratiharas [B] Solankis
 [C] Chauhanas [D] Parmaras

YASHI ADOK TELANGZÜBA : Davos

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo

1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

NAI-A YA METETTER MA?

COVID-19 TASHIDAK AGI KANGA MEJUNGI KONGSHIBA LINÜ 25 YAMAI LIR :

| Sr No | Country/Other | Total cases | New cases | Total deaths | Total recovered |
|-------|------------------|-------------|-----------|--------------|-----------------|
| 1 | China | 81,008 | 41 | 3,255 | 71,740 |
| 2 | Italy | 47,021 | | 4,032 | 5,129 |
| 3 | Spain | 21,571 | | 1,093 | 1,588 |
| 4 | Germany | 19,848 | | 68 | 180 |
| 5 | USA | 19,650 | 267 | 264 | 147 |
| 6 | Iran | 19,644 | | 1,433 | 6,745 |
| 7 | France | 12,612 | | 450 | 1,587 |
| 8 | South Korea | 8,799 | 147 | 102 | 2,612 |
| 9 | Switzerland | 5,615 | | 56 | 15 |
| 10 | UK | 3,983 | | 177 | 65 |
| 11 | Netherlands | 2,994 | | 106 | 2 |
| 12 | Austria | 2,649 | | 6 | 9 |
| 13 | Belgium | 2,257 | | 37 | 204 |
| 14 | Norway | 1,959 | | 7 | 1 |
| 15 | Sweden | 1,639 | | 16 | 16 |
| 16 | Denmark | 1,255 | | 9 | 1 |
| 17 | Canada | 1,087 | | 12 | 14 |
| 18 | Malaysia | 1,030 | | 3 | 87 |
| 19 | Australia | 1,023 | 95 | 7 | 46 |
| 20 | Portugal | 1,020 | | 6 | 5 |
| 21 | Japan | 1,007 | | 35 | 215 |
| 22 | Brazil | 970 | | 11 | 2 |
| 23 | Czechia | 833 | | | 4 |
| 24 | Diamond Princess | 712 | | 8 | 567 |
| 25 | Israel | 705 | | 1 | 15 |

SUDOKU # 5450

| | | | | | | | | |
|---|---|---|---|---|---|---|---|---|
| | 3 | 5 | | 6 | 2 | 9 | 1 | |
| | | 4 | | 2 | | 5 | 8 | |
| 2 | 6 | | 1 | 5 | | | 7 | |
| | | | | 4 | 3 | | 5 | |
| 7 | | | | | | 4 | 2 | |
| | | 8 | 5 | 3 | 7 | | 9 | |
| 5 | | 2 | 6 | 8 | | | 1 | |
| | | | 7 | 4 | | | | |
| 3 | 4 | | | 1 | 5 | 9 | 8 | 6 |

TELANGZÜBA # 5449

| | | | | | | | | |
|---|---|---|---|---|---|---|---|---|
| 8 | 3 | 4 | 7 | 2 | 5 | 1 | 9 | 6 |
| 5 | 6 | 7 | 3 | 1 | 9 | 8 | 4 | 2 |
| 1 | 9 | 2 | 4 | 6 | 8 | 7 | 5 | 3 |
| 9 | 2 | 6 | 1 | 3 | 7 | 5 | 8 | 4 |
| 4 | 1 | 3 | 8 | 5 | 6 | 2 | 7 | 9 |
| 7 | 8 | 5 | 2 | 9 | 4 | 3 | 6 | 1 |
| 6 | 4 | 1 | 5 | 7 | 2 | 9 | 3 | 8 |
| 3 | 5 | 8 | 9 | 4 | 1 | 6 | 2 | 7 |
| 2 | 7 | 9 | 6 | 8 | 3 | 4 | 1 | 5 |

OJANG LUTEP # 4998

ANGBISATESHDA :

TNGAJU :

URY :

AKAINYNG :

ERAS :

AJIBAGI :

UTSTARÜ :

UNGN :

TEMIMT :

MRUTSAJUÜ :

OJANG LUTEP TELANGZÜBA # 4997


ALIMA TENSA MEJUNGAKA ASEN DEN
 TSÜNGREM LIRA TETSÜBU KECHA MALI

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashbaji shidak asü tai'ar nai-a na asoba ita anogo den tanü nü tia medem dangang (Horoscope):



Aries
21/3-19/4

Tanü nü dak tangar anema bilemba shisatsü malitsü. Amatari ajanga nü shisatsü tipmatemtsü. Nü kijai mapa tembangtsü merangba ajanga tamakok alutsü akok.



Taurus
20/4-20/5

Tanü nai bilemba ajak mejembi tajungba asütsü. Takok angutsü asoshi maongka ajak agitsü merangtsüla. Nü mim o tangar dang mashitsüla.



Gemini
21/5-20/6

Tanü takok kar angutsü akok. Olulu jembitsü asoshi jangra akümstsü. Tiyazü o ochi na bendangtsü merangang.



Cancer
21/6-22/7

Tanü tongtibang telemtetba magitsü merangang. Nü sasa nü dak temlung melemtettsü akok. Nü mapa tangar nem nungloka meyutsütsüla.



Leo
23/7-22/8

Tanü nü dak tarendakba shisatsü ka arutsü akok. Telemtetba agitsü arendaka bilemstsü. Inyakyim ajak tensa den apet shisadanga inyaktü merangtsüla.



Virgo
23/8-22/9

Tanü nü dak tasüngdangba shisatsü ka arutsü akok. Nai bilemba ajak shitak amai mebilemstsü merangtsüla. Medemer kanga kümdanga shimang.



Libra
23/9-22/10

Tanü olemtep kar nung adentsü akok. Tangatetba tajung maliba ajanga mangatetep kar adoktsü akok. Tangar den kanga kümdanga tongteprateptsü merangtsüla.



Scorpio
23/10-21/11

Tanü nü mapa ajak nung kanga bendanga agüja inyaktüla. Ajak den putepa alitsü junger. Nai mangatetep kar azüoktettsü akok.



Sagittarius
22/11-21/12

Tanü saisapongtsü asoshi anogo tajung asütsü. Mapa ajak nung purapitetsü atema mapang tajung asütsü. Tangari ashiba mepaidoktettsü akok.



Capricorn
22/12-19/1

Tanü tembar tasen ayimtsü asoshi anogo tamajung asütsü. Nü mim o ajak den melemsatep tajungba asütsü. Junga shisadanga ajanga nai tanü tebilembatem koktettsü.



Aquarius
20/1-18/2


Tanü anogo tajung asütsü. Nü mulung nung bilemba rasaa mejembitsü merangtsüla. Meimlaba senden kar nung adentsü akok.



Pisces
19/2-20/3

Tanü shishilemba dak mashiokdaktsütsü merangang. Amatari buluba ajanga tamakok alutsü akok. Senotsü tsütsü mapang agia atemtsü mapatem nungi pilaa alitsü junger.

Arnold-i first responder tem nem teyari agütsü



Metsüremi/March 25, 2020 (Agencies):

Arnold Schwarzenegger-i Frontline Responders Fund ka amenokogo aser coronavirus tashidak den raraba nung first responders tem nem teyari agütsütsü asoshi USD million 1 tenla agütsüogo.

Arishi küm 72 tain actor yagi Frontline Responders Fund amenokogo aser iba janga medical professionals tem coronavirus agi shirangertem anepaluba mapang amshitsü asoshi masks, gowns, aser gloves amala tongtibang supply tem agütsütsü.

Iba fund amenokba indang pai Instagram ajanga lemsatopogo. "Ni kidang menden nung mener tensa majungba indang ashishia kazütsü ta bilema maliasü, tensa tajungba kümdaktsütsü asoshi asenoki ajaki akokba tashi pei shilem inyaktüla ta amanger.

"Iba ya asenok asoshi mozükitem nung yakbang nung shidakba tongpu apur inyaktetem kümzüka ayutsü asoshi tongmelang jenjang ka

agiba lir aser iba nung densemba atema ni pelar. Ni USD million ka tenla agütsüogo aser takokertemibo item lenirtem nem teyari agütsütsü imlar. Kü indang bio nung link alibai oang aser teyari agüjang," ta pai zülutsü.

Iba fund ya sen USD million 5 aazüktsü nükjidong yur amenok aser tesadangkabo jungogo.

Ya tzüraa aliba kibongtem mesütsü asoshi TikTok den longjemba sülen anogo ishika lir tang Terminator nung tongti shilem agisangi iba jenjang agiogo.

Online platform TikTok-i the 'Conan the Barbarian' nung tongti shilem agisang indang foundation; After-School All-Stars nem Pound million 3 tenla agütsü. Iba fund ya tanurtem atema afterschool programmes ka lir saka coronavirus prokshia meyoktsü asoshi school tem shibangba sülen taoba California Anghi iba foundation ajanga chiyongtsü agütsü nung ajungtsü ta bilem.

TikTok video ka nung pai

ashiba agi, "coronaviru tashidak agi timtem bener arutsüba ajanga tanurtem kidangi yokogo anungji after school programmes tem agütsütsü melena onoki item kibongtem nem chiyongtsü agütsü nung ajungtsü ta bilem."

"Nai tebilemdangba tajung aika bener alitsü akok saka nü ket nung sen melira kecha mesütetsü...Iba amala mapang ka nung TikTok pur aru aser parnoki item kibongtem mesütsü asoshi parnoki USD million aika tenla agütsütsü nangzük," ta paisa ashi.

Foundation team-i New York, New Jersey, Los Angeles aser Miami densea linük nung yimti 60 nung teyari nüngdaka aliba kibongtem nem chiyongtsü aser aonsotsü lichaliyongtsü atema gift cards tsüngtong oa agütsütsü.

Iba mapa asoshi After-School All-Stars pur Food Land, Giant, Kroger, Publix, Ralphs, Safeway, Target, aser Walmart den chiyogtsü aser food voucher agütsütsü asoshi longjemogo.

Wonder Woman 1984 & In The Heights film thinener

Metsüremi/March 25, 2020 (Agencies):

Coronavirus tashidak pokteter aliba ajanga 'Wonder Woman 1984' sayatsüba anogo thinenogo.

Taruba DC blockbuster tatongtep movie, kong Gal Gadot-i Diana Prince shilem agir, iba film ya June 5 nü sayatsü asoshi sentong yagur liasü ajisüaka Warner Bros. puri August 14 nü sayatsü asoshi telemtetba agiogo.

Warner Bros. Pictures Group chairman Toby Emmerich-i sangdong ka ajang, "Onoki 'Wonder Woman 1984,' sayatsü asoshi sangdongba mapang screen tulu nung jangradema reprangtsü nükjidong yur sangdonga liasü aser tang Warner Bros. Pictures-i iba film

ya theater tem nung August 14 nü sayatsü," ta ashi.

"Iba mapang tashi nungbo alima tensa tajungba kümer alitsü onoki imlar," ta paisa ashi.

Studio-i Lin-Manuel indang musical nung ajemdaker yangluba 'In The Heights' film mapang telatet ka makai thinenogo, koba June 26 nü sayatsü liasü aser kasa mapang nung 'Scooby-Doo' animated film 'Scoob' (May 15) aser James Wan's thriller 'Malignant' (August 14) ta film anayaa thinenogo.

Film tasen asem sayatsüba anogo tang tashi sangdonga mali.

Miranda-i Twitter ajanga Mongolbarnü pa indang musical film thinenba jangjashitsüogo,

koba by 'Crazy Rich Asians' director Jon M. Chu-i direct asü aser 'Hamilton' nung shilem agisang Anthony Ramos-i tongti shilem agir.

Pai, "Taoba küm onok #InTheHeightsMovie jangradema tangokogo. Onok Washington Heights nung adenshi aser iba otsü ashi."

"Iba otsü nenok den lemsateptsü asoshi matatei liasü. Ajisüaka asenok ajak mapang tatsüka atatsüsa akümstsü. Tang alima nung kechi atalokjar mejangjai aliba mapang In The Heights film sayatsüba anogo thinenogo.

"Asenok ajak kümzüka lia adenshitetba mapang theater tem nung iba film jangradema reprangtsü," ta pai ashi.

TAN HOPTA ATEMA - KOMA SÜLA ?

Q. Coronavirus tashidak ya mesüitem tashi asenok arogotem nung tenla ki lapoka tamanger telongjem sentep magi ata nunga koma süla?

Olong 20 shi nung March 27, 2020 tashi nung iba telangzüba ya onok dangi (e-mail - tiryimiyim@gmail.com) : (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.

Prince Charles dak COVID-19 putet saka junga lir



Prince Charles aser kinungtsü Cornwall Camilla noksa nung angur.

London, Metsüremi/March 25 (Agencies): Prince of Wales dak coronavirus aliba putetogo, ta Clarence House ajanga sangdong.

Arishi küm 71 tain Prince Charles dak COVID-19 agi shirangba yimya tera agi sayur saka pa junga dang lir, ta odongtar kati ashi aser arishi küm 72 tain Duchess of Cornwall (Charles kinungtsü) dak tendang saka virus meputet, ta ashi.

Charles aser Camilla na tang Balmoral nung shinga dena majurutepi pila lir.

Buckingham Palace ajanga ashiba agi, Queen Elizabeth II-

i lar jabaso den March 12 nü tatemsa ajuru saka la temang junga dang lir.

Chubatsüri la ajungtsü mechi tapet yimyatam amshir, ta la aliba Buckingham Palace sangdong ka ajanga ashi.

"Sorkar aser medical totuyuba nung Prince Charles aser pa kinungtsütashi angaa ang tena Scotland nung aliba ki nung lir," ta Clarence House sangdong ajanga ashi.

"Aberdeenshire nung NHS ajanga tendang, kong iba tashidak tendangtsü temsüa lir.

Tawa pai lokti mapa jendi inyaka lir asünung shiba dak nung pa iba tashidak menar

aruar memeteter."

Pai tesüsa lokti nung shilem agiba ya March 12 nung liasü saka tesüiba anogo ishika kidang nungi inyak, kong pai nisung aika den senden balala mena liasü.

Balmoral estate nung pa aliba kidang mapa inyaker aser yariteper aika tang pei kidang nübur nungi pila alir.

Charles-i Queen aser par jabaso ana den jembiogo aser parnok junga dang lir.

Department of Health and Social Care ajanga tang tesüsa sangdongba agi, UK nung nisung 8,000 dak tema dak coronavirus puteta lir aser nisung 422 shi süogo.

Kanika Kapoor dak tasemben coronavirus putetogo



Mumbai, March 25 (Agencies): Bollywood kentener Kanika Kapoor dak tasemben atema COVID-19 tendang aser iba indang osangji Mongulbarnü anguba nung positive ta putetogo.

Deobarnü la dak tanaben tendang dang positive puteta liasü.

Kanika ya tang Lucknow nung aliba Sanjay Gandhi Post Graduate Institute of Medical Sciences (SGPGIMS) nung anepaludar.

"Kentener dak coronavirus aliba maneni puteter aser la maneni anepalutsü. Tetendangba ana tashi nung negative ta meputet tashi la anepalutsü" ta SGPGIMS Director Prof. R. K. Dhiman-i

ashi. Kanika'er medemer Ojas Desai-i la den anogo ana tashi Hotel Taj nung külemi among. Kanika dak coronavirus aliba putetba sülen pa jena ao saka pa dak coronavirus mali ta putetba osang metetdaksü.

Mumbai nung aliba Kasturba Hospital for Infectious Diseases nung COVID-19 tendang dang negative ta putetogo, ta Ojas-i metetdaksü.

Tan ita tetenzüklen Lucknow nung kentener Kanika den külemi kazürtem ajak dak coronavirus mali ta putetogo. Nisungtem rongnung yimsüsürtem, shishilembar aser socialites aika dena lir.

Coronavirus wara ajanga Facebook anasü agi teimba amshir



New Delhi, March 25 (Agencies): Tang ya nisungtemi coronavirus wara ajanga kimai melui pei pei kidang dang amonger aser iba atema taoba mapang dang nungi messaging aser video chat applications kanga amshiteper.

Facebook indang blog post tesüsaba nung coronavirus agi kongshia aliba linüktem nung parnok services nung tetsükdaksü kanga ajuruba shia lir.

Taoba ita ka tsüngda messaging 50% agi teimba kümogo aser Messenger o WhatsApp dang nungi voice aser video calling anasü agi teimba kümogo, ta Facebook-i metetdaksü.

Facebook-isa ashiba agi messaging services nung traffic kanga teimba akümer aser

nisungtemi meta talang pilar aliba kibongtem aser kinungertem den osang lemsateptsü atema feed & stories products kanga amshir.

Facebook kanga amshiaka shishilembaba tsütsü tetsükdaksü kanga ajurur. Onoki services aika atema sen magir aser nisungtemi kanga amshiba mapang COVID-19 anema mapa inyakba linüktem nung advertisement business kanga tashimait küma lir, ta parnokisa metetdaksü.

"Onok indang services ya Olympics mesüra New Year's Eve nung nisungtemi kanga amshidang koktetsüsa yanglua lir. Ajisüaka, itemji tetibo majurur aser renemtsü atema mapang peria angur, saka COVID-19 wara mapang

amshiba kangasa ulura lir aser anogoshia onoki otsü tasentem ajangshir" ta Facebook company-i ashi.

Külen, Facebook team-isa Facebook nung COVID-19 Information Center aser WhatsApp nung World Health Organization's Health Alert feature tem atema kanga meranga inyaker.

"Alima public health tebilemstü tuluba akümdang aser nisungtem pilaa alitsüsa mapang ajurudang, nisungtemi onok indang services nung temulung alemstü aser iba mapang sendaktepa alitsü imlar. Item tesentaktep ajanga nisungtem kidang amongdang kanga tezü matangtsü imlar" ta Facebook-isa post nung metetdaksü.

Kentener Jackson Browne dak coronavirus putet



Los Angeles, March 25 (Agencies): Rock kentener-kenzülur tejen Jackson Browne dak coronavirus aliba puteter par kidang lir.

Arishi küm 71 tain kentener Browne-i ashiba pa temang mejungi akümba agi tendang dang COVID-19 aliba putet.

"Ni tera aketer aser temang tatsüka küma lir. Ajisüaka, ni kanga shiranger masü aser mozü agia mozü kidang amongtsüsabo masü" ta pai Rolling Stone magazine dang ashi.

Rock and Roll Hall of Fame nung züngsemer Browne ya anogo 10 shi ka kidang amonger aser pa shirangba tenzükba sülen quarantine asü, ta paisa metetdaksü.

"Quarantine asütsü tetuyuba magütsüdang iba ya atalok. Ni tangar dangi phone agi asingdangtep" ta Browne-isa ashi.

Pai virus ji koma menar'ar meshiteter saka Love Rocks NYC sentong atema New York-

i aodang mena asütsü akok ta paisa shisem.

Iba kenten sentong nung Cyndi Lauper, Dave Matthews, Warren Haynes, Susan Tedeschi, aser Derek Trucks nungertemia shilem agia liasü.

"Nisung aika dak virus ji alitsü akok saka parnok metendanger, kechiyong parnok dak virus agi meshirangdaksür. Saka parnok virus ji tangar dak menadaksütsü akok. Iba ya lanurtemi angatetsüla. Alimai iba virus noktangtsü atema inyakba nung parnok shilem agitsüla. Iba tetetzüji kimai maotsü, tangar den majurutetsüba lir" ta Browne-isa metetdaksü.

Entertainment industry nung Tom Hanks, Rita Wilson, Idris Elba, Olga Kurylenko, Rachel Matthews, Daniel Dae Kim, Kristofer Hivju, Indira Verma, Plácido Domingo, Aaron Tevitt, Andy Cohen aser Greg Rikaart nung dak coronavirus aliba puteta lir aser parnok den Jackson Browne densemer.



New Delhi, Metsüremi/March 25 : Coronavirus tashidak wara agi alima sünga prokshir aliba mapang March 25, 2020 nü New Delhi nung Ato Kilonser Narendra Modi-i anir cabinet senden ka amending minister tem kati ka nungi pilaa amenba noksa nung angur.

India nung nisung 612 dak Coronavirus putetogo; TN nung ka asü

New Delhi/Shimla, March 25 (Agencies): Bodhbarnü (March 25, 2020) tashi nung India linük nung nisung 612 dak coronavirus tashidak putetogo aser Tamil Nadu nung tang mezüing iba tashidak agi nisung ka süogo.

Linük nung iba tashidak bulua prokba mapang nung Army ordnance factories aser central paramilitary forces hospitals nung iba tashidak agi shirangertem yaritsü atema yipten 2,000 dak tema aliba isolation centre ama amshitsü.

Himachal Pradesh nunga Hamirpur district administration-i isolation centre atema National Institute of Technology (NIT) indang hostel 10 nung takdang 2,000 mesemetetogo.

Kolkata nunga yipten 2,200 aliba sorkar meyong hospital ka nung joko tanga tashidak balala agi shirangertembo magizüker aser temongdak alirtem-a anepa tekara nung yoker, kechiyong iba hospital ji isolation centre ama amshia atatsü.

Bodhbarnü Ato kilonser, Narendra Modi'er constituency- Varanasi nung alirtem den video link ka ajanga jembidang Modi-i, coronavirus tashidak nungi jenbua alitsü tajungtibaji kidang nungi mayazüksüla aser tangar anasa maotsüla, ta metetdaksü.

Modi-i, "Coronavirus agi shiranger lakh ka shi taneptsü ngudar. Iba tashidak ya kanga majung. Iba tashidak agi takar mesüra sensaker

mebendanger," ta ashi. Alima nung scientist telok kati, India nung tang amai dang iba tashidak prokra taküm May ita tom tashi nungbo India nung coronavirus agi shiranger lakh 1 dak tema akümtsü, ta sangdongba sülen India ketdangsertem kanga kükümogo.

COV-IND-19 Study Group-i renemba report ajanga ashiba agi, US aser Italy ama linüktem den medemdangra tang tashi nungbo India-i iba tashidak junga nokdangdar, ajisüaka India-i iba tashidak agi shiranger züngdangba/züngya junga masadangtet, ta metetdaksü.

Bodhbar nikongdang Union Health ministry-i ashiba agi, Maharashtra nung nisung 116 aser Kerala nung nisung 109 dak iba tashidak putetogo.

Iba tashidak putetba nisung 612 nungjagi 40 bo anepadokogo aser nisung 562 teshirangdak lir.

Tamil Nadu nunga tang tashi nung nisung 10 dak iba tashidak putetogo aser parnok rongnung kabo Bodhbarnü süogo.

Linük nung paramilitary sepaitem indang hospital 32 (yipten 1,900) sorkari isolation centre atema agiogo, aser item hospital nung COVID-19 agi shirangertem anepalutsü, ta Delhi nung sorkar ketdangser kati metetdaksü.

Paramilitary sepaitem indang hospital 32 ji Central Reserve Police Force (CRPF), Border Security Force (BSF), Indo-Tibetan Border Police (ITBP) aser Sashastra Seema

Bal (SSB) indang lir aser item hospital ji Greater Noida, Hyderabad, Guwahati, Jammu, Tekanpur (Gwalior), Dimapur, Imphal, Nagpur, Silchar, Bhopal, Avadi, Jodhpur, Kolkata, Pune aser Bengaluru densema yimti balala nung lir.

Item hospital 32 nungji yipten ajak agi 1,890 lir.

Ordnance Factory Board (OFB)-ia isolation wards atema yipten 285 lemzüksüogo, ta Defence Ministry osang ka ajanga metetdaksü.

Coronavirus tashidak bulua prokba nung ajemdaker Kashmir nung ketdangsertemi ashiba agi, Kashmir nung iba tashidak agi shiranger 11 ji dang masü saka iba dang nungi kanga timba alitsüa akok, kechiyong nisung aikati ainlen senzüba osang mimshir.

Deputy Commissioner, Srinagar, Shahid Iqbal Chaudhary-i, nüburtemi parnok ainlen senzüba osang kanga mimshir, aser ibaji quarantine kübok melinüba agi lir, ta ashi.

Coronavirus agi shirangertem anepalutsü atema hospital nung aliba yipten agi meperitsüsa akümtsüa akok, anungji hotel aika quarantine-cum-hospital zone kumdaktsüner, ta Bengaluru nunhg Biocon chief Kiran Mazumdar-Shaw-i ashi.

"Coronavirus agi shirangba temaitsü alirtembo hospitals-i tama anir aotsü menüngdak, saka quarantine-cum-hospital zone nung tama anepalutsüla," ta laisa ashi.

Coronavirus anema raraba mapang jang seret nung sen 3 agi agütsütsü

New Delhi, March 25 (Agencies): Bodhbarnü Centre sorkari, Coronavirus anema India linük anogo 21 shibangba mapang nung linük tesem ajungalen sensaker crore 80 nem subsidised jenjang nung wheat aser jang agütsütsü, ta metetdaksü.

Linük anogo 21 shibangba mapang nung linük tesem ajaklen sensaker nem seret ka nung sen 27 jenjang wheat ji seret nung sen 2 agi agütsütsü aser jang seret nung sen 3 agi agütsütsü, ta sorkari metetdaksü.

Bodhbarnü Ato kilonser, Narendra Modi leniba nung Cabinet senden ka amenba mapang nung iba telemtebaji agia liasü.

Cabinet senden nung jembidang Modi-i, anogo 21

linük shibangba mapang nung shingaia timtem majangshitsüla, iba denji külemi nüburtem timtem pungbadaktsütsü atema mera agia inyaktsüla, ta jembia liasü.

Ato kilonserisa Minister tem dang, nüburtem timtem angateta peipei department ajanga tapet inyaktsüla, ta tuyua liasü.

March 24 aonung Modi-i coronavirus COVID-19 anema linük anogo 21 shibangtsü atema sangdonga liasü.

Modi-i, "COVID-19 anema March 24 ayaterm 12:00 ako nungi tenzüka hopta asem (anogo 21) linük tesem ajak shibangtsü," ta sangdonga liasü.

Cabinet senden nungsa Health Minister, Harsh Vardhan-ia iba tashidak anema state sorkartem den amalitepa inyakba osang metetdakja liasü.



Ahmedabad, Metsüremi/March 25 : COVID-19 tashidak wara nokdangtsü mechi linük anogo 21 shibangtsü totuyuba agütsür lia Ahmedabad nung nüburtem nungdakba osettsüset alitsü asoshi dokan kima nokdaktepa aliba noksa ka yangi angur.

NPR aser Census mapang atsülanger

New Delhi, Metsüremi/ March 25 (Agencies): Census House listing phase aser National Population Register (NPR) updatation mapatong April 1, 2020 nungi tenzüka September 30 tashi agitsü sentong liasü, ajisüaka coronavirus tashidak nokdangtsü atema Ato kilonser, Narendra Modi-i anogo 21 tashi linük tesem ajak shibangtsü sangdongba sülen item mapatong agitsü atema mapang atsülangogo.

Census 2021 ya shilem ana (Houselisting aser Housing Census) lemsar April-September, 2020 nung agitsü sentong liasü aser Population Enumeration ji February 9, 2021 nungi February 28, 2021 tashi agitsü liasü.

Assam dak alaka state aser Union territories ajak nung NPR ji Cencus 2021 Phase 1 den külemi agitsü benoka liasü.

Bodhbarnü Home Ministry-i sangdong ka

ajanga, "COVID-19 tashidak poktetba ajanga India sorkar States/Union Territories-i tekümdangtsü osang sangdongogo. Ministry of Home Affairs-i March 24, 2020 anogo nung linük nung COVID-19 nokdangtsü atema India sorkar ministries/departments aser state/Union territory sorkartemi lemtetba t e l a t e t b a t e m metetdaksüogo. State/UT sorkar aikati-a states shibangba sangdongogo. Ministry of Health & Family Welfare, Government of India-i tangar anasa maotsü densema tekümdangtsü aika shiogo," ta metetdaksü.

"Iba dak sendakba nung Census 2021 aser NPR updatation mezüngbuba shilem April 1, 2020 nungi tenzüka agitsü atema State/UT sorkartemi lemteta liasü saka tetuyuba tasen ka magütsüba tashi atsülanga atar," ta Home Ministry-i metetdaksü.



Chennai, Metsüremi/March 25 : Coronavirus tashidak wara mechi linük anogo 21 tashi shibangtsü totuyuba agütsüba nung shilem ka ama domestic aser international flight ajunga athiba sülen Chennai Airport nung anentena aliba noksa nung angur.



Southeast China tsütsü Fujian Province kübok Fuzhou nungi March 25, 2020 nü medical expert tem Italy-i COVID-19 tashidak anem raratsü asoshi aotsü mapang tangokba noksa ka yangi angur. Fujian Province nungi medical expert 14 shi tayimtsü ka nung Italy-i Bodhbarnü apusoo ogo. Taoba mapang nunga China-i mozü ketdangser nisung 22 den mozü balala tone 22 dak tali Italy-i yoka lir.

COVID-19: Nisung asüba nung Spain-i China ajateter

Metsüremi/March 25, 2020

(Agencies): Spain nung taoba ghonda 24 tsüngda nisung 700 dak tali asüba ajanga China ajatetogo aser iba linük dang timba asüba linükji Italy dang lir.

Kanga keraa prokshia aoba coronavirus tashidak agi timtema aliba mapang aid worker, business aser healthcare system yaritsü asoshi US nung telok anaprong nungi White House aser Senate lenirtemi sen trillion \$2 agizükogo.

Johns Hopkins University ajanga ashiba agi, COVID-19 tashidak agi meneper nisung 424,000 nungi nisung 109,000 dak tali taneptsü nguogo aser nisung 18,900 dak tali süogo.

Tokyo nung Bodhbarnü nisung 40 dak tema dak coronavirus putet, aser ibai Japan nung anogo ka nung timtiba putetba lir, ta osang ajanga ashir.

Tokyo nung tang coronavirus agi shiranger nisung 200 shi lir, aser ibaji north tsütsü Hokkaido asetkong nung aliba dang temaba kümogo, kong nisung 163 dak iba tashidak puteta lir, ta NHK

ajanga ashir.

Mali nung nisung ana dak COVID-19 tashidak putetogo aser iba linük nung nisung anaji mezüngbuba alitsü, shirnok March 12 aser 16 nung France nungi shilanga liasü.

Saudi Arabia nung iba tashidak prokshiba ajemdaktsütsü mechi curfew tesashiba benoker, aser Riyadh, Mecca aser Medina nungi shinga marudaktsür.

Iba totuyuba ya King Salman-i agiükogo aser Bodhbarnü nungi tenzüka province ajak nung nüburtem senzüsembongba nokdangtsü.

Spain nung tesüiba ghonda 24 tsüngda nisung 738 asüba osang jangjaogo, aser iba linük nung coronavirus tashidak prokshi tenzüker anogo ka nung timtiba asübaji March 25, 2020 nü alitsü, ta health ministry ajanga sangdong.

Mongulbarnü tashinung nisung 2,696 sür liasü aser tang 3,434 jungogo aser kasa mapang Mongulbarnüsa nisung 39,673 dak iba tashidak puteta liasü aser tang nisung 47,610 jungogo, ta ashir.

Nisung agi mesemi aliba tepuokdak coronavirus

prokshiba nokdangtsü mechi tepuokdak alir nisung 4,010 chioker, ta Ethiopia indang Federal Attorney General ajanga sangdong.

Tatok agütsüba bendangertem pei linüki yoktsü, ta Attorney General Adanech Abiebie-i ashir.

Britain nung coronavirus den raratsü asoshi National Health Service den yariteptsü atema nisung 158,000 dak temai volunteer asütsü mulungogo. UK nung coronavirus agi nisung 422 taküm samatsüogo.

France nung coronavirus agi nisung asüba ya sorkar ketdangsertemi sangdongba dang khenyongi tali lir, kechiaser parnoki mozüki nung asüba dang azünger saka pei kidang mesüra retirement home tem nung asüba maden, ta hospital federation tekolakbai ashir.

"Mozüki temi agütsüba data dang onoki meteta lir... Ketdangsertemi tali sangdonger, saka retirement home aser pei kidang asürtem jungjunga züngdangra kanga agi timba asütsü," ta French hospital federation tir, Frederic Valletoux-i ashir.

Mozambique nung container ka nung nisung tasü 60 shi ngutet

Maputo, Metsüremi/March 25 (Agencies):

Ethiopia nungi nisung 64 tasü mang khu abenba container ka telung nung north-west Mozambique nung ngutet, ta mozüki ketdangsertemi ashir.

Asürtem ya Mongulbarnü anüing sentsü aketba cargo container ka nung ngutet, koba Tete province nung truck ka nung bena liasü. Kasa cargo nung taküm alira kar liasü. Tang Tete nung temperature ya 34 C (93F) shi lir.

"Ethiopia nung sudi ta temulung melemi aliba illegal immigrant tem Malawi nungi bener aoba truck ka Tete nung aliba Mussacana weight bridge nung anendaktsü aser yangji nisung 64 tasü ngutet. Nisung 14 dang taküm liasü. Parnok ya tango junga mesashiteti asü sudi,

ta temulung melemtetir lir," ta ketdangser kati ashir.

Noksa ka nung taküm alirtemi tasü mang müketa mener aliba angu, aser noksa ka nung mozüki ketdangsertemi taküm alir nem first aid agütsüba nguogo.

Provincial immigration odongtar Amélia Direito-i ashiba agi, container nung alir nisung 78 prong ya Ethiopia nung liasü aser parnok rongnung nisung 64 tango mesashiteti asü.

"Truck anir aser pa den yariteper (tenaprong Mozambique nung lir) ya police temi puogo," ta Direito-i ashir.

"Item nisungtem anir aotsü asoshi pa nem sen 30,000 meticais (pound 385 shi asütsü) agütsütsü nangzük, ta gari anisangi ashir. Linüki ozüng

alema Ethiopia nung anir aitba nung yariteperem bushi tenzükogo," ta lai ashir.

Malawi nungi Mozambique-i gari telung nung mener aor Ethiopia nung aiki süogo, ta South Africa nung aliba Ethiopian embassy ajanga osang agütsü, ta Addis Ababa nung aliba foreign ministry ajanga ashir. Asürtem aser parnok tejangja metettsü merangba mapang lir, ta parnokisa ashir.

Migrant tem South Africa-i aotsü meranger timbai Mozambique ajanga aor. Iba continent nung rongsenketsüng tsütsü South Africa ya tajungtiba lir, aser makamaiter migrant tem, talisa Lesotho aser Zimbabwe amala linüktem aser Ethiopia nung iba linük nung oa alitsü jangrar.

Boko Haram teloki Chad sepia 92 tepset

Boma, Metsüremi/March 25

(Agencies): Boko Haram telungpuri Chad sepia tajemba agi 92 tepset, aser ibai linük nung mitkar dak lendong agütsüba rongnung tesashitiba lir, ta Tir Idriss Deby-i Mongulbarnü ashir.

"Aseb sepia, non-commissioned officer aser officer tem parnok 92 taküm samaogo," ta Boma nung Deobar aonung lendong atalokba indang tiri ashir.

Sepai aika asüba tang mezüngbuba lir," ta pai Lac province nung lendong atalokba tesem semdangba sullen ashir, kong Niger aser Nigeria den arrtsüa lir.

Boma tzümeketli nung sepaitem dak amakba ya ghonda tenet shi agia liasü, aser lendong ajurua alirtem yaritsü yoker daka akha, ta sepia kati osangbener dang ashir.

Paisa ashiba agi, iba lendong nung mitkar indang gari 24 raksatsü aser Boko Haram teloki mitkartem indang prangbong aser injangtem speedboat tem nung auyar ao.

"Tsükchirtemi iba zone nung kanga sashia amak," ta sepai tanishir kati ashir.

Lake Chad area nung telungpur tali akümba nung iba lendong ya shilem ka lir,

kong Cameroon, Chad, Niger aser Nigeria arrtsü agi muketbanger lir.

Boko Haram teloki Nigeria nung 2009 nungi rara tenzüker aser iba sullen anüdoklen kidanger linüki meraloka ao.

Chad den arrtsü anasa Borno state nung Nigeria sepai aika taküm sama, ta Nigeria mitkartem Mongulbanü shia liasü.

Lendong agütsürtemi rocket-propelled grenade aser danga nok-o-nü tulu amshia Hombor nikonktsütsü Gorgi yimtsüng amak.

Tang tashi shirnoki iba lendong agütsüar mejangjateti lir, saka iba region nung Boko Hara maser ISIL (ISIS) West Africa Province telok kanga yakyaka lir.

Lake Chad Basin nung Boko Haram teloki tali asendenshir lendong agütsür.

2015 küm nungi iba tesem nung aliba linüktemi Multinational Joint Force den lungjemer telungpur mitba maparen nung yariteper.

Boko Haram teloki küm ter jungnüa azüdokshia aruba mapang nisung 36,000 shi tepsetogo aser nisung million ana jungnüa northeastern Nigeria nung prokshidaktsüogo, ta United Nations ajanga ashir.

Afghanistan nung Sikh nung tekülem ki ka amak; nisung 25 asü

Kabul, Metsüremi/March 25

(Agencies): Brangbong bena alir aser taküm bendanga agütsür bomb pokloktsürtemi Bodhbarnü Afghan yimtiba, Kabul nung Sikh nung tekülem ki ka maka nisung 25 tepset aser security force temi lendong agütsür ajanga tepset, ta sorkari ashir.

Islamic State telungpur teloki sangdong ka nung iba lendong agütsüba kibur küma metetdaksü. South Asia nung taoba mapanga Islamist telungpuri Sikh nung dak tenük yoka arur. Afghanistan nung parnok kibong 300 majung lir.

Anepdang züngia lia lendong agütsür ghonda ishika lir Interior Ministry odongtar Tariq Arian-i ashiba agi, security force temi operation agiba tembangogo aser lendong agütsü ajanga tepsetogo. Saka pai lendong agütsür kwi liasü, iba indangbo mashi.

Iba tekülem ki indang compound nung alir nisung 25 tepset, nisung ti yiru aser parnok 80 kümzük, ta ministry ajanga ashir.

Kin tila, Sikh nung rongnungi parliament züngsem, Narender Singh Khalsa-i ashiba agi, lendong atalokba mapang iba ki telung nung nisung 200 shi temai madoktetir lir ta osang aru.

"Taküm bendanga agütsür

bomb pokloktsür nisung asem dharamsala telungi ait. Iba tesem sünga tekülemer adenshia alidang prangbong bena alirtemi injang khaloktsü tenzüker," ta pai ashir.

Iba ki tezülen kinungertem adenshi aser pei kinunger tia jangjatsü atatepdang parnok jeptepa liasü.

1980s tatemlen Afghanistan tesem balala nung Sikh nung nisung 500,000 shi prokshia liasü, kong kibong aika putu sa putu lua aru, saka civil war tenzükerba aser Taliban telok poktetba sullen aika jena ogo.

Taliban odongtar kati Twitter ajanga lendong ya parnoki agütsüba masü, ta metetdaksü.

United States, India aser Pakistan densema linük aika aser nisung meimchir temeden asoshi nokdakba lokti tentet aikati iba lendong aitsü.

"Onok aoksar aser temulung yirur... Afghanistan nung ketdangsertemi kin tilatem aser parnok tekülem agiba tesem kümzüka ayutsü khuret tulu lir," ta Amnesty International South Asia ajanga Twitter nung ashir.

Afghan anüdoklen Jalalabad nung 2018 küm Sikh nung dak tenük yoker taküm bendanga agüja bomb pokloktsüba lendong nung nisung ter dak tema asü, koba Islamic State ajanga tenüng agia liasü.

Aboi nung COVID-19 den raratsü renemshir

Dimapur, Metsüremi/March 25 (TYO): Coronavirus tashidak nungi jenbua alitsü asoshi Aboi Town Students' Union (ATSU) renemshir, ta sangdong ka ajanga ashi.

ATSU ajanga jila nung lemjem aser tongtibatang tesem ajunga nung tzü aser hand sanitizer yutsü tenzükogo. Anogo 21 ashi linük tesem ajunga shibangtsü sangdonga liaka ATSU tir Lipsing-i jila nung aliba nüburtem nem "JUST WASH HANDS" ta asüba osang sangoktsüner.

Jila nung iba tashidak wara nungi kümzüka alitsü asoshi jelia renemshiba maparen ya

ketdangsertem nungi senotsü teyari bendena tzü aser sanitizer ya ali. COVID-19 tashidak wara den raratsü asoshi WHO, MoHFW GOI aser H&FW Nagaland ajanga totuyuba agütsüba sullen anidaktsü ajungshir, ta ATSU sangdong ajanga ashi.

COVID-19 tashidak wara alima sünga prokshiba yagi Aboi nunga renemshia aser kümümshia alitsüsa akümer, anungji danga state aser linük nungi arua aliba nüburtem dang pei sasa lokti nungi pila farm mesüra alo nung alitsü ajungshir aser pei kinungertemi chiyongtsü aser apensüoshi

agütsütsüla. Aboi nung nisung ter shi lokti nungi pila lir aser kaketshiri parnok dang sorkar nungi totuyuba agütsü matai pei sasa iba tashidak den raratsü asoshi akokba meratem agütsü ajungshio, ta ATSU general secretary Manwoak-i ashi.

Social media nung Aboi nungi tawa tesem balala nung jajartem tenüng agüja alirtem ya quarantine süa lir, ta paisa ashi.

Kasa mapang ATSU-i Ward Task Force züngsemtem dang teka shidoktsü asoshi inokja aliba unit tem anepalutsü mepishiogo.



March 25, 2020 anogo nung COVID-19 tashidak nungi nübor tem kümzüka tesayuba agüja Nagaland police-i mask aguja senzüba noksa nung angur. (Tuensang, March 25, 2020)



Tang alima ayimsünga aoba Covid -19 tashidak indang osang peroka aser iba den raraba nung shilem agia Fazl Ali College (FAC) aser Mokokchung Town Baptist Arogo (MTBA) na külem sür yangluba hand sanitizer kar Mokokchung Press Club pur nem angati agütsü dang tangokba noksa nung angur. Tanü parnoki hand sanitizer-ji truck anishir telungjem, MMC staff, Civil hospital (IMDH), TB hospital, Lenjem hospital, ART centre, Woodland nursing home, ABAM Impur, SBI Main branch & regional office, treasury office aser totzü agütsür kar densema lemstüogo. Ano maneni parnokisa telok aser tongtibatang tesem kar sema kasa mapaji inyaktsü sentong lir, ta osang ajanga angazüker. Mokokchung, March 25, 2020.

Tuensang DC-i senden ka ayongzüka amen

Dimapur, Metsüremi/March 25 (TYO):

Deputy Commissioner Tuensang, Kumar Ramnikant IAS-i novel Corona Virus (COVID - 19) dak sendakba nung March 24 nü DC's Conference Hall nung Arogo, kin balala loktitentet aser kaketshir lokti tentet den senden ka ayongzüka menogo.

DC-i, tashidak ajanga amokmerenba indang lemsatepba den COVID-19 nokdangtsü asoshi koda tongtibatang iba indang lemsatep aser pai COVID-19 den takok ngua raratsü asoshi Arogo, kin balala loktitentet, kaketshir loktitentet aser sorkar telen balala longjemer inyaktsü nüngdaker ta ashi. DC-isa linük ajung nung inyakyim nokdangba indang rasaa ashiba den March 23 nü video conference ajanga Nagaland Chief Minister den sensak asema indang metetdaktsü.

Maneni pai, osang taila, olulu osang prokshiba dak sendakba nung nüburtem nem tangazükba agütsütsü mepeshi. Item osangtem ajak ya ketdangsertem nungi mezüing jangjashitsüla, ta pai ashiba den sentepa aliba lokti dang kidang kazütsüba, teka metsütsü, tejak nung takok tashi mekongshitsü, hajiba mapang teka aser tissue agi nembanger hajitsüba amala inyakyim nüburtem nem

metetdaktsütsü mepeshi.

Ramnikant-i ashiba agi, iba monpu nung yimra kanga bulua menar aser iba ya COVID-19 dak sendaka lir ta mebilemstüla. Ajisüaka takok tashi kümdanga alitsüla.

Senden nung CBLT Executive Secretary-i, District Administration dang iba tensa azioktsü asoshi sentong tejangja yanglutsü mepeshi aser ashiba agi, lokti tentet balalai iba sülen tashi angaa anidaktsü. Police Church pastor-ia, tensa majungba ajanga pa Arogo Jubilee benjung amungtsü aliba thinenogo, ta ashi.

Maneni DC-i, Corona Virus tashidak prokshia meyoktsü asoshi lokti adenshia aliba tesem nung metzü mashi memetsütsü asoshi tenokdangba agütsür aliba indang metetdaktsü aser ashiba agi, aibelenertem temzüng ozüing kübok merenshitsü. Paisa, lokti tentet balala dang nisung timba tongtetsü asoshi pei oshi nung posters, audio messages amala lenmang balala ajanga tekümdaktsü metetdaktsütsü mepeshi.

Senden tatemi DC-i züngsem ajak dang tebandang ajak toktsür ajak longjemer COVID-19 tashidak anema nokdaktsü ayongzüka. Paisa, teka amteper külemi inyaktsü nüngdakba nenshia metetdaktsü.

ZTC-i Sali metzü metsüba nokdang

Dimapur, Metsüremi/March 25 (TYO):

Urban Development Department, Govt of Nagaland notification No. UDD/MISC/99/2010 dak ajemdaker nüburtem ajangzüktsü mechi Zunheboto Town Council-i Zunheboto jila kübok riju aser lokti adenshia aliba tesem nung sali metsü aser alokmetsü memetsütsü tenokdangba agütsüogo. Tetuyuba metsüngareta benoka inyaktsü aser aibelenertem nem temzüng ozüing kübok tapet temerenshi

agütsütsü, ta sangdong ka ajanga metetdaktsü.

Zunheboto Town Council-isa, Zunheboto jila nung dokan ajak dang MRP nung dang oset-tsüt ajak ayoktsü tuyuogo aser osettem jenjang tur ayoktsü asoshi meima ayuba aser jenjang ajungketer ayokba khenyongi magizüktsü, ta metetdaktsüogo.

Aibelenertem ajak temzüng osüing kübok merenshitsü, ta kasa sangdong ajanga metetdaktsü.

CORONA VIRUS (COVID-19)
PRACTICE SOCIAL DISTANCING...
SAFETY COMES FIRST!

Together We Can...
 Nagaland against COVID-19

Do's

- Maintain at least 1 metre apart as social and physical distancing
- Work from home and avoid meetings, classes, tutorials, workshops, etc., as far as possible
- Postpone all social, cultural or private events & functions. Keep number of guests minimal if social events cannot be postponed or avoided
- Stay home, Stay safe

DON'TS

- Don't visit crowded or public places
- Don't attend Non-essential social, commercial, religious, cultural, sporting events, etc
- Don't shake hands and hug as matter of greeting
- Don't travel unnecessarily

If you feel unwell (Cough, fever or difficulty in breathing), avoid exposure to others and immediately call the helpline numbers

Helpline No: 7005415243 / 9856071745 / 7005536953 / 011-23978046
Email at: ncov2019@gmail.com, nlssu.idsp@nic.in Toll Free : 1075
Contact respective District Helpline numbers

Messi aser Guardiola nati \$1.08 million tenla agütsü



Metsüremi/March 25, 2020 (Agencies): Barcelona nungi nungtugu asayar Lionel Messi aser Manchester City manager Pep Guardiola nati coronavirus tashidak anema raratsü asoshi euro million kaka tenla agütsüogo.

Argentina nunger asayar Messi-i agütsüba tenla ya Barcelona nung Hospital Clinic aser par linük nung medical centre tsüingda lemdanga agütsü, ta Marca sangdong ka ajanga metetdaksü.

"Leo Messi-i coronavirus den raratsü asoshi clinic nem tenla agütsüogo. Nai nongita yariba atema kanga pelar," ta Hospital Clinic-i tweet asü.

Taoba Barcelona asayar aser manager Guardiola-ia Angel

Soler Daniel Foundation aser Medical College of Barcelona-i tenzükba Angel Soler Daniel Foundation nem tenla agütsüogo.

"Pep Guardiola-i Angel Soler Daniel Foundation nem Covid-19 tashidak anema raratsü asoshi health equipment alitsü atema euro million ka tenla agütsüogo," ta College sangdong ka ajanga metetdaksü.

"Angel Soler Daniel Foundation ajanga Medical College of Barcelona-i achaayangba donation campaign-i nüburttem aser collegiate doctor tem nungi medical material aser sen bendener, koba Catalonia nung health centre tem nung anünga aliba medical equipment tem

alitsü asoshi lir.

"Iba ajanga healthcare staff tem atema respirators aser personal protection equipment tem 3D printing ajanga yangluba nung teyari agütsütsü," ta kasa sandong nung shia lir.

Guardiola-i tenla magütsü tsüingda iba campaign yagi anogo asem nung euro 33,000 bendener liasü.

Europe nung Italy sülen iba tashidak agi Spain dak kanga mejungi kongshir lir. Tang tashi nung iba tashidak agi Spain nung nisung 2,696 süogo aser tashidak menar alir 40,000 shi lir.

Guardiola soa intetba aser Messi küm 13 asüandang Barca nung arua adenba Catalonia tesem ya iba tashidak agi kanga mejungi kongshir lir.

Indian Olympic Association-i sentong yanglushitsü

New Delhi, Metsüremi/

March 25 (Agencies): Indian Olympic Association-i Bodhbanü ashiba agi, Tokyo Olympics thinenba ajanga asayartem kar indang career nungbo kongshitsü aser sports ministry den angatetepa IOA-i sentong tanga ka yanglushiba mapang iba ken o benoka asadangsü.

Tanga linük aser lokti tentetam ama International Olympic Committee-i Olyimpic küm ka agi thinentüsü asoshi telemtetba agiba IOA-i pelshishia agizükogo. Iba asayamung ya July aser August nung asayatsü renemer liasü saka alima ajunga nung tang COVID-19 tashidak prokshia timtem nung aliba ajanga thinenogo.

"Asayamung küm ka agi thinenba ajanga asayartem kar indang career/ qualification aser sentongtem nung kongshitsü, koba taruba ita asadangsü aser onoki tenüngdakba teyari agütsütsü," ta IOA Secretary General Rajeev Mehta-i IOC aser Tokyo Games organizers tem dangi yokba shiti nung shia lir.

"Ni tang tongtepratepdar aser India ajunga nung inyaksangshi nokdangher aliba aginba sülen Federations den senden ka ayongzüka akatsü. Asayartem kümzüka toktsütsü ya onok mapa tongtibangtiba

"Sentong lepareprangshi yanglushitsü asoshi onoki Ministry of Youth Affairs and Sports den tongteprateptsü," ta pi ashi.

Asayamung thinenba ajanga asayartem nem anisüngzük agütsüogo saka iba ajanga asayartem kar indang qualification mejangjai kümogo, koba asaya aika iba tashidak ajanga qualification inyakyim thinentüsü aküm.

Kasa mapang nung International Olympic Committee aser Tokyo 2020 Organising Committee-i Olympic thinentüsü asoshi telemtetba agiba Paralympic Committee of India (PCI)-i pelashishia agizükogo aser ashiba agi, iba telemtetba ya asayartem aika asoshi anisüngzük lir, shirnok Paralympics asoshi renemshitsü mejangjai liasü.

"Covid-19 tashidak pokteter aliba ajanga tang India ajunga nung inyaksangshi nokdangher aliba aginba sülen taruba jenjang agitsü asoshi PCI jenjang tajungba ka nung toktsütsü. NPC India den NOC India-i, IOC o Tokyo 2020 LOC nati asayamung thinentüsü asoshi telemtetba agiba pelashishia agizüker," ta Paralympic Committee of India secretary general Gursharan Singh-i ashi.

India nunger asayartemi Ranking sota atatsü akhanger

New Delhi, Metsüremi/March 25 (Agencies): Olympics thinenba ajanga terabbo anisüngzükogo, saka B Sai Praneeth densema India nunger badminton asayartem aikati Badminton World Federation (BWF)-i kechiba rankings sota mayur aser Tokyo Games atema qualification inyakyim dak sendakba nung osang tejangja magütsür ta bilemer.

BWF-i, COVID-19 tashidak prokshia aoba ajanga All England Championships sülen asayatsü aliba HSBC BWF World Tour ajak thitsüogo aser Olympic qualification atema anogo atsülangtsü asoshi aikati khanga aruogo, koba April 28 nü tembangtsü.

Ajisüaka International Olympic Committee (IOC)-i Olympics küm ka agi thinenba sülen BWF-i rangking sota atatsü ta asayartemi bilema liasü.

"Coronavirus tashidak pokteter aliba ajanga BWF asayamungtem thinenaka onok indang point tem ajemtsür. Swiss Open thinenogo saka kü point odang ajemtsü. Yamaji qualifiers

asayamung thinenba ajak atema point aginra kechi koda asütsü ni memetet," ta Praneeth-i PTI dang ashi.

"BWF-i rankings bosa sota atatsüla iba sülen parnoki Olympics asayatsüba anogo apir qualification atema telemtetba agitetsü, saka tang tashi nungbo osang tejangja mali," ta paisa ashi.

Praneeth, shiba tang Olympic nung mezüing asayatsü asoshi merangdar pai ashiba agi, pa iba asayamung nung asayatetsü masayatetsü mejangjai kümogo kechiyong pa ano point atema asayatsüsa akümtsü.

"Olympics July asayatsü asübo ni kü indang qualification jangajar lila saka tang küm ka anunga lir asünung qualification inyakyim ano tenzükshitsü aser ni ranking point atema asayatsüsa akümtsü. Ranking memelenshi asayaa atatsü tasak lir aser küm ka tsüingda kechi ataloktsü mejangja," ta pai ashi.

London Games quarter-finalist Parupalli Kashyap, shibai Saina Nehwal den külemi world

body dang qualification mapa atsülangshitsü asoshi khangogo, paia rankings sota atatsü asoshi BWF-i kechiba mapang talangka agir ta shiogo.

"Olympics thinenogo anungji BWF-i kechi jenjang agidir ibaji ataa lidi. Parnoki ranking dena mesoti lir. Kechi koda asüjar onoki mejangja.

"Ternemshiba jungrara masütsü kechiyong linük nung training agitsü tamakoktsü kümogo," ta Kashyap-i ashi

Maneni HS Prannoy-ia kasa tebilemtsü lemsatepogo.

"Asayamung tenzükshiba mapang nungbo kü indang ranking 100 tongnüa lur alitsü. @bwfmedia-i ranking sota ayutsü asoshi kecha minyaker," ta pai mongolbarnü tweet asü.

Praneeth den tetsür kija asayar P V Sindhu aser tebur tarep asayar Chirag Shetty aser Satwiksairaj Rankireddy na Olympic atema qualify süogo.

Kasa mapang nung BWF-i sangdong ka ajanga ashiba agi, Olympic qualification dak sendakba nung telemtetba ka parnoki yakta sangdongtsü.

Fury aser Wilder na asaya thinener

Metsüremi/March 25, 2020 (Agencies): Ajaki kanga yongyaa aliba Tyson Fury aser Deontay Wilder na asaya Thinenogo. Coronavirus tashidak pokteter aliba ajanga iba asaya July 18 nü asayatsü aliba October ita-i belener tuogo, ta Top Rank chairman Bob Arum-i ESPN dang ashi.

February 22 nü Las Vegas nung asayashiba mapang Britain nunger asayar Fury-i round tenet buba nung America nunger asayar Wilder koka WBC title aben aser asaya 31 khen danga tamakok mongui asayatetogo.

Wilder-i tanaben asayashitsü asoshi jazük saka tashidak prokshia aoba nokdangtsü atema Las Vegas nung casino temi Europe nungi nüburttem marudaktsütsü asoshi tenokdangba agütsür aliba ajanga MGM Grand nung iba

asaya asayatsü renemer aliba ama masayatetsüsa kümogo, ta Arum-i ashi.

Fury indang co-promoter Arum-i ESPN dang ashiba agi, iba asaya khenyongi masayatetsü.

"Iba mapang tashi nung MGM lapoker alitsü malitsü ajia mejangja.

"Lateter aliba anogo asayatetsü masayatetsü mejangja. Onoki kecha shia matetsü," ta Arum-i ashi.

"Iba asaya atema kong training agitsü? Tesüleni jenjang ka atsüngzüktsüla. Ticket koma ayoktsü? British nunger asayar ya tarua marutetsü nung koda asayatsü ta shitetsü," ta pai ashi.

Mezüngbuba asaya ana nung British fan tem aika arua Fury pusemogo, shiba dang "Gypsy King" ta ajar.

BILEMDANGANG

"Kümdanga aliba ajanga na makoksatsü"